









1563

473

ROMVLI AMASAEI

# ORATIO

HABITA IN FVNERE

PAVLI. III. PONT. MAX.

  
*Bibl. Soc. Coll. Rom. de Lsa*



1563

THE GREAT AMERICAN

# O R A T I O

IN THE SENATE

OF THE UNITED STATES



ALEXANDRO FARNESIO  
S. R. E. CARDINALI  
VICECANCELLARIO  
POMPILIUS AMASÆVS  
S. P. D.

ECREVERAM post Romuli Amasæi  
patris mei obitum, omnes eius lucu-  
brationes, quas nōdum in lucem edi-  
tas ac multas quidem reliquit, primo  
quoque tempore diuulgare: Cum of-  
ficii mei ac pietatis esse ducerem, eius qui mihi uitæ  
huius lucisq: autor fuisset, memoriam in hominum  
animis renouare, quæ maxime possem ratione fa-  
mæ perpetuitati consulere: Tum etiam quod me  
non parum adiumenti Latinæ linguæ ac eloquentiæ  
studiosis, cuius nō mediocrem is inter æquales suos  
omniū consensu, tam in scribendo, quam ex tem-  
pore loquēdo laudem consecutus fuerat, allaturum  
sperabam: si minime contemnenda quæ ad imitan-  
dum, sibi ex nostri temporis usu proponerent, cum  
ipsis illarum facultatū exemplaria communicarem.  
Quapropter quicquid hætenus à multis uariisque  
occupationib. mihi successiui temporis fuit, totum id  
partim in propriis quibusdam commentationibus  
a ii meis

meis ad studiosorum itidem utilitatē, partim in patris ipsius lucubrationib. recensendis, ad certumque ordinem redigendis consumpsi. Quod sane opus difficile perplexumque fuit. Erant enim ea (quod homo assidue præter interiora studia sua, docendiq: munus, plurimis fuerat publicis negociis Bononiæ primum, deinde Romæ districtus) obscurius confusiusque scriptæ. Itaque mihi, utpote qui eius & scribendi, & scripta etiam sua emendandi, liturisque obducendi totam rationem noram, ut eas librariis, uel impressorib. explicatiores dilucidioresq: traderem, propria fuerunt manu describendæ. Quod cum absoluissem, statueram omnes in unum idemque uolumen coniectas, ac simul iunctas & connexas impressorum typis excudendas curare. Verum ab hac me opinione amici complures remouerunt: Cum dicerent, lentum id longiorisque temporis negocium fore, ac diuturniorem hominum expectationem de operis ipsius gratia non parum detracturam. Satis adhuc & plus etiam quam oportuisset, moræ interiectum. Se uero mihi suadere, ut ab eo potissimum libro, qui omnium ipsius absolutissimus ornatissimusque uideretur, ordiner: Tum deinceps alios atq: alios subiungerem. Hinc futurum, ut diuersarum & crebriorum editionum nouitate maiorem in dies ab elegantib. literatisq: hominibus gratiam inirem.

Mouit




Mouit me cum amicorum autoritas, tum ipsa etiam ratio, ac eorum sententiæ mihi omnino parendum censui. Subiit uero mentem patris consilium, de oratione quamprimum publicanda, quam in PAVLI .III. PONT. MAX. funere habuerat, posteaque (ut perpetuo pie, sancteque illius præclarissimi principis memoriam colebat, seduloque tuam sibi gratiam demereri studebat) summa diligentia expolierat. Quod cum præueniens mors irritum reddidisset, id me superstitem iam exequi, ac nihil mihi antiquius esse debere censui, quam ut oratio simulatque hoc perficiendi facultas oblata esset, tui perillustri nominis munita protectaque autoritate appareret. Atque ad id quidem posteaquam consilium cum illis meum communicavi, laudationemque inspicendi copiam eis feci, assiduos hortatores habui, amplissimos homines eosdemque clientes tuos, Antonium Aelium, Michaellem Turrium, Antonium Bernardum, Io. Antonium Fachinetum, Thomam Liliū, quos omnes Pontificii honoris, uitæ integritatis, præstantisque doctrinæ causa nomino, Cumque his Io. Angelum Papium, clarissimum celeberrimamque per omnem Europam famæ legum interpretem, Quem uere Oratorum Iuris peritissimum, Iuris autem peritorum eloquentissimum nostrâ hæc ætas appellarit. Tum uero Camillum Palæotum & Franciscum

ciscum Bolognetum Bononiæ Senatores, ambos exi-  
mia probitate, morum elegantia & eruditione in-  
signes: Qui etiam olim una mecum, à Romulo pa-  
tre Pausaniam edendi sibi munus depoposcerunt,  
imprimendumq; curarunt. Orationem hanc igitur  
de illius plane diuini principis, tuis met ipsius, to-  
tiusque præcellæ familiæ tuæ uerissimis laudibus, hi-  
storica potius fide, quam laudationis ritu comme-  
moratis, fœlicissimis auspiciis tuis in uulgus profe-  
ro, eandemque amplitudini tuæ in manus dedo &  
dedico: fidei tutelæq; tuæ commendo. Decet enim  
tibi olim orationis ipsius auctoris, nunc superstitum  
filiorum, domusque ac fortunarum nostrarum Pa-  
trono munus illud offerre, quod tuum ueluti Præ-  
dium ad FARNESIÆ gentis gloriam decusq; pro-  
tulit: Cui & Romulum ipsum, & Romuli prolem  
perpetuo præcipueq; inseruire uoluisse, & id ipsum,  
& alia literarum monimenta, quæ propediem ex lu-  
cubrationum nostrarum quasi penu in lucem  
fauente DEO depromentur, ut præsen-  
tibus posterisq; fidem faciant, fore  
confido. Vale Amplissime be-  
nignissimeque Patro-  
ne diu fœlix.

BONONIA. VIII. Kal. Decembr.

M D L X I I I.





I 420

ROMVLI AMASAEI ORATIO  
HABITA IN FVNERE

PAVLI. III. PONT. MAX.

V  
ESTRVM uos quidem PATRES  
AMPLISSIMI *amorem, obseruan-*  
*tiam, pietatem erga PAVLVM. III.*  
PONT. MAX. multis, ac maxi-  
me perspicuis documentis hodierno die  
facile declarastis: neq: enim mutata so-  
lum ueste, sed uultus etiam, atq: oculorum insolita tristitia, lugu-  
bri silentio, atq: omni uehemēter affecti animi significatione, quo  
mārore, quo desiderio optimi, ac Sanctissimi parentis uestri obi-  
tum prosequamini: Quamque dolenter & acerbe hanc Reip. or-  
bitatem feratis omnibus qui religiosissimam tanti funeris pompā  
celebraturi in hanc basilicam conuenerunt, testatum ut esset ef-  
fecistis. Ego uero, cui uos nominatim hoc munus detulistis, ne pa-  
rum omnino digna tam apparatis exequiis laudatio mea uideri  
possit, magnopere uereor: Nō paruis enim me, aut leuibus oppres-  
sum atq: implicitum difficultatibus sentio. Nam si PAVLI  
FARNESII unius maximi, & sapientissimi post hominum  
memoriam Pontificis laudes omnes coner dicendo complecti, atq:  
A exor-

exornare, multo quam opus foret longior, & ingentibus, quibus  
in presentia uestrum prope obruitur collegium, occupationibus  
minime apta continget oratio. Sin ad compendium breuitati ser-  
uiens maximarum rerum ueluti aceruum redigam, non grauitur,  
& copiose uti decuit PAVLVM laudasse, sed cum rudi & iei-  
no commentario in hanc tantæ amplitudinis lucem parum pu-  
denter produsse uisus fuero. Illud præterea me uehementer solici-  
tum habet, quod confecto iam annis corpore, fracto atq; afflicto  
recenti dolore ob mei Principis, mei optimi atq; humanissimi pa-  
rentis interitum animo, dicendi facultate uestrarum Patres au-  
rium & animorum uel attentionem, uel patientiam me promeri-  
turum ne sperare quidem audeo. Iam uero quo ingenii, quo me-  
morie, quo spiritus ac uocis conatu uestre Farnesi proceres tan-  
to auo dignissimi Nepotes, tuæq; in primis ALEXANDER  
cuius ego auctoritate & impulsu hoc in loco quicquid habeo exi-  
stimationis, periclitari audere coactus sum, de me expectationi  
respondebo? Cuiusq; mihi rei non omnino nulla est ratio habenda,  
Qua nam ego PAULE Pater optime ac sanctissime, memoris  
gratiq; animi declaratione, suauissimis, quibus me, quoties ad te  
ueniebam, cum certissima tuæ erga me uoluntatis testificatione  
uerbis alloquebare, ac simul perueteri iam meæ in te colendo, atq;  
oris numinisq; tui maiestate adoranda pietati satisfaciam? Verum  
quoniam quod mihi tam præter opinionem meam impositum est  
onus, neq; deprecari, neq; deponere, neq; in alias tam dignitate,  
quam dicendi exercitatione Illustres personas reuicere licitum fuit,  
quod semel suscepi, aut uestra fretus Patres benignitate constan-

ter perferam aut succumbendum si fuerit, planum certe omnibus faciam, non animi mihi ui: in tanto publico ac priuato luctu alacritatem, sed ob ingentem rei magnitudinem, mentis atq. ingenii firmitatem defuisse. Magnæ existunt, & graues quoties è uita Pont. max. excedere contigerit, publici luctus causæ, quod nempe populi omnes, qui in eius fide, atq. officio fuerunt, sibi communem parentem ereptum intelligunt. Ac ne tota Resp. quasi nauis gubernatore amisso, uiolentis agitetur tempestatibus, cum maximo naufragii periculo metuunt. Quo uero plures, & maiores in eo uirtutes enituerint, quantoq. fuerint Illustriora in commendatas fidei suæ ciuitates merita, eo tanquam salutare quodam lumine orbatæ, & anguntur acerbius, & luctus minuendi uix rationem ullam queunt satis efficacem, aut idoneam reperire. Ubi igitur primum de Pont. Max. obitu nuntius cæperit percrebescere, passim subitæ cuiusdam trepidationis, gentes & populi certissimas dare significationes consueuerunt. Lugent ciuitatum ordines: Squallent oppida: Moenia, & agri propemodum ipsi, desiderio & moerore consenescent. Tanti ego ac tam iusti doloris causam huic funebri urbis iustitio subesse facile ostendā, si quæ ad PAVLI uitam exornandam, atq. illustrandam summus & præpotens Deus, natura & fortuna Dei administræ congesserint bona, aut enumerare, aut certe summam perstringere potuerò. Sic enim fiet, ut quam gaudenti animo illis paulo ante fruebamur, tã nunc esse nobis tanta uirtute, tantaq. diuini illius uiri sapientia, tamq. innumerabilibus laudibus carendum, grauiter ac pene impatienter feramus. Sed quisnam erit laudationis exorsus? Eius

Patria.

primas iure sibi patria vindicat. In ea enim primum nostrum qui libet vitalem haurit spiritum: In ea, in quo moueatur, in quo quiescat solum nascitur: In ea alitur, educatur, instituitur: Magni autem refert tum ad res gerendas, tum ad gestarum gloriam comparandam, quæ cui Patria obtigerit: In ea uero urbe natus est PAVLVS, uel ALEXANDER potius (hoc enim primum a parentibus appellatum fuisse nomine scimus omnes) in qua si patriam sibi quisque optare posset, ecquis quam in alia quauis nasci non mallet? Romæ nempe, quæ cum maiestatis, & gloriæ semper domicilium fuerit, fidelissimus omnium nationum, & populorum portus, Augustissima sociorum ara, Coniunctæ cum imperio firmissima religionis sedes, Totius denique orbis terrarum instar, & urbis una in toto terrarum orbe indefinito digna nomine. Quæque ut olim ab aliis atque aliis & condita est, & amplificata gentibus, sic hospitali ipsa (ut ita dixerim) complexu, ex omnibus terris conuenas recipit, nullique hominum infensa nouitati suam omnibus in quibus modo uirtutis aliquis splendor eluceat, gratiam ac benignitatem impertit. Quod si non ab hac, a qua tandem quis patria nomen et decus accipiet? Sed quam bene, & præclare cum Paulo actum est, qui non plus fere accepit ad famæ celebritatem, quam patriæ dederit? In posterum enim omne tempus nunquam satis plene, satis ornate poterit Urbs laudari, quin magnus, & admirabilis quidam ad eius laudes sit cumulus accessurus. Quod in ea Paulus. III. Pont. Max. primum lucem aspexerit. O felix eius ciuis, atque alumni accessione Roma, qui in omni ueteris memorie commemoratione, cum optimis quibusque, & maxime laudatis.



tiſ Romanis Principibus, ac Pontificibus maximis conferri, multis anteferri, nemini poterit poſtponi. Iã uero ut generis obſcuritas, ac nouitas infringit hominum animos ac debilitat: Sic ad cogitationum ſublimitatem, & magnarum rerum molitionem ueluti quandam proficit nobilitas. Atqui non clari tantum in Farnefia gente Pauli maiores fuerunt, ſed beati opibus, ac plurium oppidorum perpetua ditione potentes, neq; Romanorum tantum Procerum nomine nobilitati, ſed ob res fortiter ac ſtrenue geſtas, in eos etiam, qui de rebus Italicis conſcripti ſunt, comme narios, atq; annales magna cum laude relati. Nam ut abolitum iam ſerre uetuftate magnum imaginum numerum prætereã: fuit ex hac gente abhinc annos ferme .ccc. Petrus Farnefius qui Imperator cum ſumma poteſtate iuſtos exercitus ducens, in magna bellorum uarietate inſignibus claruit uictoriis: Idemq; cum Florētinorum copiis præſeſſet, in Piſarum oppugnatione, conſoſſo ab hoſtibus equo, mulo inuectus, conſeruata priſtina animi præſentia, per medias mœnium ruinas irrupit: Conſecutaq; mox ſuorum multitudine, ſubito impetu captam & expugnatam urbem Florentinæ Reip. tradidit. Fuit Paternus Pauli auus Ranutius, qui Eugenio .xiiii. Pont. Max. periculoſiſſimis temporibus, ſciſſa in diuerſas partes Repub. fortem ac fidelem Reip. ueſtræ operam exercitus Imperator nauauit: Quique Alſonſi Neapolitanorum Regis exercitus ingenti cum gloria rexit. Non poſſum ſine impiæ quodam modo obliuionis nota Petrum Farnefium Ancaranium cognomento, clarum illum quidem in diuerſo genere laudis, & ſumma nominis celebritate uirum prætermittere, qui

Genus

Majores

cum

cum luculentas sibi fortunas ex iuris ciuilis interpretatione comparasset, domum & prædia Bononiæ reliquit, unde literatæ iuuentutis collegium, quod adhuc ex ipsius testamento ad Farnesiæ gentis tutelam pertinet, aleretur. Patre genitus est Petro Ludonico, spectata fide atq; officio in Romanam Remp. uiro. Verum non minus clarum, aut Illustre fuit Maternum genus. Letissima enim Foemina Ioanna Mater eius è Caietana fuit gente, non solum prisca, sed etiam nobilissima. Ex ea certe Bonifacium octauum Pont. Max. fuisse constat, cuius multæ, ac præclaræ laudes literarum sunt monumentis mandatæ. Pauli igitur alterum genus Imperatorium, alterum Pontificium. Iam uero ut generosarum Stirpium in feraci solo propagata semina, ad optimam frugem facile proficiunt, sic paterna & auita præstantes nobilitate animi, si bene, atq; ingenue educantur, ad egregiam se laudis spem celeriter efferunt, & corroborant. Et his quidem maioribus ac Parentibus ortus Alexander (cui rei plurimum amplissimæ fortunæ obsecundarunt) à puero liberalissime educus, atq; institutus est. Nam cum ab ipsis prope incunabulis, & eximie indolis ac diuini prope ingenii certissimum specimen daret, immensoq; literarum amore flagraret, & domesticos exqui

Pater

Mater

Educatio

Doctores

sitæ eruditionis magistros habuit: & iam puer Pomponium lætum Romanæ tunc Academiæ principem audiuit assidue, & obseruantissime coluit. Tantos adolescentulus in optimarum artium studiis processus effecerat, ut qui longo iutervallo æquales omnes suos superasset, multo maioribus natu merito par esse uideretur, cum clarissimorum in omni liberalium disciplinarum genere hominum

minum

minum fama allectus, Ficini, Politiani, Chalcondylæ, Lascaris, ad eos se Florentiam contulit. Quo tempore, & eum Pico Mirandulano admirabilis ingenii, & incredibilis doctrinæ adolescente: Et cum Ioanne Medice, qui Leo postea fuit. x. cotidianus ei fuit usus, ac familiaritas, & suavisissima in communibus maximarum artium studiis æmulatio. In Patriam inde reuersus, cum latinæ Græcæq: linguæ cognitione, atq: iis omnibus disciplinis, è quibus constat pulcherrimus humanitatis orbis, omni prorsus ex parte esset perpolitus, Ad publicos iam honores aggressus, scriptum primum inter sanctiores scribas, qui Apostolici uocantur, fecit: Quo sane munere perite ac diligenter fungens, summaque, quam semper retinuit, tam manus quam styli elegantia, egregie cum ciuibus, tum peregrinis omnibus carus esse cœpit, multasq: ac minime uulgares laudes est consecutus. In Farnesio itaq: quod quisq: (uti fit) in eo cum admiratione adamarat, aliis probitatem, humanitatem, facilitatem, pudorem, aliis modestiam, liberalitatem, exactam aliis utriusq: linguæ couiunctā cum multiplici doctrina & mirifica ingenii celeritate peritiam, omnibus uero omnia collaudantibus, tam multarū, tamq: spectatarū uirtutum fama impulsus Alexander. VI. Borgius Pont. Max. eum Protonotarii primum superioris loci titulo honestauit: Mox Pontificatu Montis Phaliscorum, & castri Inui decoratū, cum annum ageret duodetricesimum, magno Patrum consensu in sacrosanctum adlegit Cardinalium collegium: Illa supremo pro-

Honores  
publici

Cardina-  
lium crea-  
tus

uitate

uitate commemoro, me Patres, queso, libenter & benigne, uti adhuc fecistis, auscultate. Primum omnium tanto sublimiori honoris gradu nihil elatius, uirtutes duas specie dispares, gravitatem cum comitate, prudentia ita coniunxit, ut dignitatem suam semper retinuerit, & mira quadam morum facilitate amabilem se omnibus, & gratiosum præbuerit: Pont. dicto uti optime de se meriti parentis ita audiens fuit, ut alius nemo magis: libertatem tamen in dicendis sententiis nullius cuiusquam beneficio deuinctam esse debere putauit. Consilio, auctoritate, gratia, graui, & ornato orationis genere cum cæteris antecelleret, quicquid tamen aut agendo, aut dicendo perfecisset, amice ac beneuole cum suis collegis communicabat. Legari in prouincias extra ordinem solent è uestro Patres collegio, qui prudentia, qui rerum usu & auctoritate, belli pacisq: munia sustinere posse uideantur. Alexander non ita multo postquam Cardinalis esse cœperat, propter excellentem, & iam spectatam ingenii consiliiq: magnitudinem dignus est habitus, qui maximis legationibus fungeretur. Nam & Carolo .VIIII. Gallorum Regi per ea tempora cum exercitu Neapolim contendenti obuiam missus est: Et legatus Picenum, legatus Umbriam obtinuit. At enim Magistratus capeffere, etsi per honorificum est, cum præsertim non cupide appetentibus, sed officiose accipientibus decernuntur: Quanto tamen est præclarius ita se in magistratibus gessisse, ut nihil cuiquam ad calumniandum loci relictum fuerit, laudum materiam non facile quibus dicendo assequi possit? Ea fuit Alexander in Populos aditus facilitate, ea affabilitate, ea in iure dicendo æquitate, ea postre

mo

Legationes

mo in factionum dissidas tollendis, in redigendis in ordinem potentioribus, in Ciuitatum incommodis propulsandis, priuatorum miseris subleuandis prouidentia: ut cum nulli uideri posset ordini indulgentior, & que tamen summis, & infimis esset iucundissimus: In publicis negotiis semper grauis, In priuata consuetudine & conuictu festiuus ac perurbanus: De suo magnificus ac liberahis: Atheni non modo non profusus, sed neq; etiam appetens. Non ad speciem hæc dicuntur: Sed quod laudationis ueritas postulat, non prætermittuntur: atq; eo recensentur fidentius, quod apud uos Patres, quibus cum ille amanter & familiariter uixit, hæc habetur oratio: Neque uero his ille uirtutibus uni se Alexandro. VI. commendauit: Sed Iulietiam, Pii, Leonis, Hadriani, Clementis postremo sibi est iudicia promeritus; atq; adeo ut eorum quilibet de eo quam optime merendi, præcipuam quandam & perpetuam curam ac sollicitudinem præ se tulerit. Neq; uero Alexander illis uoluntatem suam, officia, studia minus præstitit, quam si eorum cuiuslibet dignitatem, fortunâsq; suas omnes acceptas referre debuisset. Quare nemo ex illis fuit, cuius secretioribus consiliis omnibus non intonus fuerit ac familiarissimus: Nemo profusus, qui pro suo singulari quædam de eo iudicio, non ei omnia potissimum demandaret, quæ cura atq; industria gerenda, consilio atq; animi magnitudine sustinenda forent. Inciderunt calamitosissima illa Clementis tempora, quorum neminisse horret animas: Ea cum Farnesius tanquam è specula prospiceret, imminens periculum, nullo negotio deuicare, atq; in propinqua sua diuisionis oppida, & deuia, et satis etiam munera se recipere potuisset.

Clementis  
tempora.

etiam

B

Vrbem

Urbem tamen pro sua in Patriam pietate, in principem suum fi-  
de sibi neuiquam deferendam censuit: Ea igitur capta illum in  
arcem confugientem secutus, atq; ibi cum eo aliquandiu obsessus  
est. Inde hostium concessu, ut ad Carolum Casarem in Hispani-  
am traiceret, cum eoq; de pacis conditionibus ageret, emissus,  
cuius Lyguine fines attingisset, de instructissimi Gallorum in Ita-  
liam exercitus aduentu nuntium accepit, Parmam itaq; cuius Ci-  
uitatis Pontifex erat, certa ductus ratione diuertit. Nam & pa-  
catissima non ea fuit Civitas, & cum primis in nostras, Patres,  
Reip. fide, & officio constans. Alexandri vero ipsius multus, &  
magnis deuota beneficiis, quodque ille maxime pro sua ad bi-  
ne de quam plurimis merendum propensissima voluntate estima-  
bat, in ea ceteros, & luculentos fructus habebat, unde electorum  
ex illa urbana procella posset miserius subleuare. Ad eum cum  
aliquot Cardinales, qui e tanto euaserant, & ut ita dixerim,  
enatarant naufragio, confugissent, eius maxime consilio & conso-  
latione subnisi, non modo animos non desponderunt, sed ad ali-  
quam etiam Pontificis, & maximi, & Collegiarum suorum, qui in  
Adriani mole inclusi atq; obsessi tenebantur, liberandi spe emeri-  
gi potuerunt. Quare cum hoc deliberationum omnium duce, &  
auctore inter illas profugas patrum reliquias de reliqua salutis  
spe cotidie fere consultum fuisset, paucis post mensibus Clemens  
recepta iam libertate, magnas Farnesio gratias habuit, quod in  
summa rerum desperatione ad Reip. gubernacula, que sibi de ma-  
nibus turbulentissimæ extorserant bellorum tempestates, ipse ul-  
tro accurrisset, neq; Pontificiam quasi statione prius deseruisset,  
quam

quam & Pontificem Max. ex illa se obsidione subtraxisse, tu-  
taque in urbe & pacata iam esse omnia compertum habuisset.  
Consecutus est biennio fere post, Caroli V. Caesaris cum Pont.  
Max. congressus, cum et Clemens imperii coronam Bononiæ de-  
tulit. Hunc qui aduentante Caesarem pro Pontifice obuius acci-  
peret, delegit Clemens. Hunc summum & præcipuum idem Cle-  
mens, & Carolus consiliorum omnium auctorem, hunc in stabi-  
lienda inter ipsos amicitia adiutorem, hunc habuerunt ad pacem  
inter Christianos Principes conficiendam, & ad suscipiendum  
atq; apparandum Turcicum bellum frequentem atq; assiduum  
hortatorem. Fuit iterum Clementi, cum uix à priore colloquio al-  
ter annus exisset, ad Caesaris congressus Bononiam redeundum.  
Diu tunc animi anceps fuit Clemens, Farnesium ne id emixe con-  
tendentibus. Urbanis magistratibus, cunctisq; ciuibus, Urbi Le-  
gatum præficeret, an cuius opera & consilio, magnis arduisq; in  
rebus uteretur, secum duceret. Hic, qui Clementem audirent, non  
desuerunt, cum diceret, uideri sibi absente Farnesio consilia actio-  
nesq; suas omnes mancas atq; intermortuas fore. Quod tantum  
scilicet huic umi tribueret, ut sine eo non recte ac satis prouidenter  
consilium capi, Non grauitat atq; ornate decerni. Non que de-  
creta essent, mature ac constanter peragi, ac constitui posse puta-  
ret. Neq; senatus tantum principis absentiam à rationibus consi-  
liisq; suis, quam maxime alienam fore cogitatione complecteba-  
tur. Principem enim in collegio nostro, locum multos iam annos  
Farnesius tenuerat, & ita tenuerat, ut ille in sedendo ac dicenda  
sententia primatus, non ei ex maiorum instituto secirco obigisse

Pontificis  
et Caroli  
Imperato-  
ris cōgres-  
sus pri-  
mus.

Congres-  
sus secun-  
dus.

condemp

B 2

uideri



uideri posset, quod esset in ordine antiquior, sed quod uite digni-  
 tate longe ceteros antecelleret) Verum non tam senatus Princi-  
 pem a se tunc intelligebat Clemens desideratum iri, quam specta-  
 tam toties maximis in rebus, maximam uiri fidem, gravitatem, con-  
 stantiam, auctoritatem. Quo tempore ipse quoque Caesar quam  
 grauiter Farnesii absentiam laturus fuisset, non semel, ac mini-  
 me quidem dubiis uocibus declarauit. O admirabilem Patres  
 uirtutem, quam & presentem amplissimi terrarum Principes  
 præcipuis quibusdam honoribus dignam censuerint, & absen-  
 tem certissimis communis desiderii testimoniis fuerint prosecutu-  
 ri. Comitatus uero secundo etiam illo congressu Clementem Far-  
 nesius, egregiam Reip. operam nauauit. Atque in tanto quidem  
 tunc fuit non solum apud collegas suos, sed apud Cesare ipsam,  
 & Cesarianos omnes procures, honore, ut in eum intuentium uo-  
 ces exceptæ sint, non debuisse, qui tantum uirtute & sapientia  
 excelleret, ante senem, quam Pont. Max. fieri. Tantos adhuc  
 fecerat Alexandri gloria cum uirtutum omnium meritis, tum  
 consentienti hominum uoce incitata progressus, ut sublimius iam  
 non posset, quam ad supremum honorum fastigium, & celsissi-  
 mum dignitatis gradum subuolare. Aliquot inde post menses,  
 Potentissimi Gallorum Regis rogatu, idem Pont. Masiliam  
 classe profectus est, quo illum ut sequeretur Alexander, non gra-  
 uate se tum eius, tum Regis precibus adduci fuisset. Sed quo mi-  
 nus tum principum optatis, tum suo perpetuo in Remp. studio  
 satis tunc facere potuerit, fortuna aduersata est: quæ mox aquis-  
 sumam & faustissimam futura, suæ in eum acerbatis breui illo  
 quidem



quidem. Sed uehementi impetu, totum, ut ita dicam, uirus profudit. Nam & non multo ante Hostia dum redit (Pontifex enim, uti scitis, Hostiæ fuit) euersa, qua uehebatur nauis, & Tyberinis uorticibus nix seruatum ac semiammum Urbem reddidit. Et non ita multo post graui & periculoso prope afflicta morbo, quin cum hominum expectationi exasperet, quam minimum absit. Est uero Patres ita comparatum, ut quem admodum in anni uarietate ac uicissitudine, noue quasi Cæli ac siderum conuersiones, & nouis temporum quæ uel solstitia, uel æquinoctia, appellamus, trepidant momentis, sic plerumque humane uitæ cursus, tanquam ortus quidam uehementiore motu, & grauiore quasi quodam cum sonitu conuertatur. Eos ut sepe, & secundissimas quasque res insidiosa illa, & nostris insensa prosperitatibus, quam Nemesis Græci Poeta duxere, opprimat fortuna: & rursus acerbissimorum casuum importunitatem, letissimum atque optatissimum posteris temporis excipiant euentus. Quæ tam breuiter ac summam, tam etiam celeriter Patres percurri, eiusmodi (nisi meum me fallit iudicium) sunt, ut Alexandrum præclaris omnibus antea uitæ rationibus comparatione instructum atque ornatum ad Pontificatum. Atque accessisse se dubitari nihil omnino possit. Quis enim ad eius laudes cunctis accedere potuit: Cui patria, urbs, urbium omnium regina, & in ea perillustre ac omni dignitate & copiis affluens patrum & matrum genus obigerit? Cuius admirabile ingenium, atque animi indolem, præclara adhibita institutio ac doctrina, omni uitæ elegantiis, omni quæ latinis Græcisq; literis continetur,

Epilogus  
superio-  
rum par-  
tium.

sinetur, uirtutis, atque humanitatis genere excoluerit & perpo-  
 huerit. Qui post aliquot publicos honores ingenti cum laude ge-  
 stos, magno Patrum consensu in uestrum collegium fuerit coopta-  
 tus: Qui pro Pontifice Italiae florentissimas praefecturas, scien-  
 ter & cum summa iurisdictionis & equitate rexerit: Neque sine  
 ulla modo suspicionem eas, quibus praesuit, Ciuitates gubernarit,  
 sed iusti etiam moderatique imperii eximiam laudem una uniuersorum  
 Populorum uoce reportarit: Quem sex deinceps Pontifi-  
 ces Alex. uirtutis atque optimarum artium merito carissimum  
 habuerint: Quem sui collega miseri & calamitosi temporibus  
 patrem & patronum sibi extitisse senserint: Quem salutis cer-  
 tum uindicem suae Resp. cognouerit: Quem Clemens. VII. &  
 Carolus. V. primo secundoque itidem congressu coniunctionis in-  
 ter ipsos confirmatorem & sequestrem, pacis constantissimum  
 auctorem, pulcherrimarum actionum socium atque adiutorem  
 amantissime excolauit fuerint: Quem postremo & a graui ua-  
 letudine, & a fatali quodam periculo seruatum, & quasi e me-  
 diis emersum heroicae fortunae fluctibus, urbi ac terrarum po-  
 tius orbi Deus incolumem reddiderit: Ab hoc inquam homine,  
 uel ut uerius dixerim, heroe, quidnam ex iis rebus omnibus abesse  
 potuit, quae à tot tam laudabiliter, tamque cum gloria actae  
 uitae meritis, à tot superatis laboribus, tot exhaustis erumnis,  
 Pontificatum ei primum Alex. traderent, & à Pontificatu  
 Alex. suo ipsius tempore, ut Reip. heu quam alieno, certum illi  
 inter pios, ac beatos manes locum attribuerent? Ab hoc loco ad  
 Pontificia Farnesii acta pergens, multis de causis dum eius uir-

cunctas enumerare cupio, cum animi quadam suspensione hæreo.  
 Nam si multas quod uideo necesse fore, prætermitto, facile uos  
 animaduersuros intelligo, parcus illum atq; exilius multo quam  
 oportuit, collaudatum, sin plexasque omnes persequor uereor Pa-  
 trēs, ne cum uos longiore oratione detinuerō in hac interregni tre-  
 pidatione, uestrarum ingentium occupationum non satis, ut de  
 laudatione uidear habuisse. Scio non frustra esse à maioribus no-  
 stris institutum, ut magni, & illustres uiri in funere laudarentur,  
 Hinc illi scilicet, perpetuæ orationis honorem, & ad grati erga  
 benemeritos animi præmiorum declarandam, & ad corporum &  
 animorum imaginem exprimendam, ac postremo ad uiuentium  
 animos, ad illorum emulationem excitandos, multo magis ad  
 commodatum & appositum, quam ceteros omnes iustorum &  
 parentationum ritus censuerunt. Hunc maiorum morem non sa-  
 tis habuisse me ratum putaro, nisi plene atque absolute singulas  
 laudationis partes peregero. Verum cum multæ sint huius quæ  
 nunc lugemus Pontificis Atax laudes, tanto uis quæ hominibus  
 attribui possunt, maiores, quanta inferioris ferè ordinis Pontifica-  
 tus ipse Atax omnem ceterorum omnium hominum statum excu-  
 perat. Eam mihi statuo præcipuam hæc in parte cautionem esse  
 debere, ne dum nimis diligenter omnia persequi studeo: maxima-  
 rum & maximo illustrium rerum per quas Pauli fama æterna  
 si se facile adequauit, nihil penitus loci relinquam. Testata est  
 eius Patres, omnibus suorum omnium familiarium ac necessario-  
 rum uocibus temperantia, integritas, innocentia, animi moderatio.  
 Ciuiles hæc ac populares sunt uirtutes: quam uero non multis com-  
 munes,

quid succisui temporis, è maximis poterat occupationibus eripere, id totum ad eos legendos & peruolutandos auctores conferebat: qui uel Græca, uel Latina oratione, quod uis diuinæ, aut humanæ doctrinæ genus literarum monumentis mandassent: Cuius rei maxime perspicua extant argumenta, sexcenta prope librorum uolumina ipsius manu, à primo ad postremum paginarum marginem politissime ac scientissime pernotata. Ex his ille fontibus dicendi, intelligendi, res maximas gerendi, præcepta hauriebat. Neque solum ut Latina Græcaque lingua uteretur tanquam patria & populari hac nostrate (fuit hoc enim ei, ut scitis Patres maxime peculiare munus) consequebatur: sed ea etiam, quæ summa & iucundissima ex rerum cognitione percipitur, uoluptate contentus, reliqua prope omnia oblectamentorum genera contemnebat. Quod si, aut ualeitudinis, aut ingenii recreandi causa, aliqua sibi esse opus animi relaxatione intelligeret, modo in Sabunos, modo in Phaliscos, ubi plura habuit gentilitiæ hereditatis ac dictionis castella secedens, uel sylvarum & uiridiorum ipsius maxime solertia dimensorum aspectu, uel elegantium & literatorum hominum, quorum semper domi habuit selectam copiam, se nihil à gratis: & musis abhorrentibus oblectabat sermonibus: quos ipse, ut erat inter suos maxime festiuus, eo suauitatis atque urbanitatis sale aspergebat, ut quam gravis & ornatus inter collegas suos in curia, tam in amicorum cætu iocundus & dulcis uideretur. Apposite itaque, quod quidam ex eruditorum numero de M. Antonino Pio literis prodidit, de hoc sui prædicabant. Quod frangi esset sine contumacia: uerecundus si-

Studium.  
literarum

Animi re-  
laxationes.

ne ignavia: sine tristitia grauis. Fuit illud in *Alexandro* sum-  
mæ modestiæ: quod nihil sibi unquam uel arrogauit, uel popo-  
scit: sed hominum de se iudiciis acquieuit: Quod suam in omni  
uel publica, uel priuata disceptatione, non auctoritate, sed ratio-  
nibus sententiâ comprobauit. Neque plus omnino unquam con-  
tendit: quam quod æquo animo ab iis contra quos erat nonnun-  
quam dicendum, acciperetur. Atque ita ueritatem & dicen-  
di libertatem tuebatur: ut nemo tamen se ab eo lesum queri pos-  
set. Fuit animi eximie cuiusdam moderationis: quod inuidos &  
obtrectatores (cuiusmodi fere homines ampliore fortunam, cum  
uirtute coniunctam petulantius plerunq. lacescere consueuerunt)  
nunquam ipse acerbius ultus fuerit: quam ut ignoscendo existi-  
mare eos cogeret, se cui essent insensi, indignissimū fuisse: Quodq;  
Pontificatum *Atax.* cum petisset nunquam, bis uero ante pauco-  
rum ipsius felicitati aduersantium collegarum contentione extor-  
tum sibi quasi de manibus perspectum haberet, nihil tamen gra-  
uius questus est, quam ut diceret à Deo tam diuinum honorem,  
non ab hominibus decerni: à se illum remouendi neminem facul-  
tatem habiturum: si sua sibi diuinitus aliquando maturitas ad-  
foret. Fuit incomparabilis humanitatis ac facilitatis: quod nemo  
in ullo eius aut magistratu, aut præfectura quoties uoluit non  
est admissus, non patientissime quandiu uoluit auditus: non ita di-  
missus, ut si quod maxime uoluisset, non impetrasset, intellexisset  
demum se postulare non debuisse, confiteretur. Fuit integritatis,  
quod à iusto, æquo, bono, nulla cum gratia, nullæ cuiusquam pre-  
ces auertere potuerint: Quodque semper inuictum pecuniæ, in-  
uiolatum

uiolatum cuius corruptelæ animum gesserit. Quid uero dicam, quantum fidei constantia ac perpetuitate, quantum liberalitate ignotos sibi pariter ac notos deuinxerit: Cum nulla Europæ pars, nulla Italiæ Ciuitas, non magnam aliquam & insignem gratiam Farnesio Cardinali debuerit, egerit? Et ea domum pro certis maximeq; ueris homines haberent, quæ ab eius ore, seu uocis potius oraculo profecta dicerentur. Hospitalitas magnum & præclarum quoddam est in Principe uero decus: Quid enim facere possit elegantius, quid luculentius, quam si eas quibus abundat, copias bonorum commodis impertiat? Id laute semper & splendide fecit Farnesius. Nam & urbana domus quam & ante amplissime dimensam atq; exædificatam habuit, & nunc ornatissimam & plane Pontificiam nepotibus reliquit, & quas item in singulis suæ ditionis castellis magnifice extruendas curarat: eæ omnes & illustribus hospitibus, & peregrinis ac uiatoribus qui undecunque diuertissent, semper potuerunt. Iam uero quo officio, quo studio amicos coluit, qui neminem dilexerit, quem aut suo non prouocarit beneficio, aut cui de se bene merito non large ac prolixè gratiam retulerit? Qua uero fuit in cognatos, affines, aut quauis coniunctos necessitudine, pietate, qui neminem eorum suæ cuiusquam facultatis, aut felicitatis expertem esse siuerit? Nam quanta in nepotibus quam liberalissime educandis, atque instituendis fuerit cura atque diligentia, ex eo liquido constat, quod à Præstantissimis doctoribus atque optimarum quarumque artium magistris, & puerorum mentes honestissimis moribus, ac præceps sine ulla indulgentia

Nepotum  
institutio



imbui atque informari. Et iam adolescentium ingenia omni-  
que Latina Græcaque lingua literis mandata fuerit, uel intelli-  
gendi, uel dicendi facultate erudiri, instrui atque expoliri uolue-  
rit. Quod ipsemet & quid discerent, secum cum illos haberet,  
cotidie inspiciebat, ad omniaque uitæ officia certis rationibus  
atque exemplis, teneram eorum ætatem fingeat atque informa-  
bat: & quod tum per ipsos Præceptores, tum per alios graues  
ac optime fidei uiros, quandiu & Bononiæ & Patauii fuerunt,  
quo studiorum eos causa dimiserat, an in officio manerent, ut cer-  
tior fieret, sedulo operam dabat. Qua certe rectissimæ institu-  
tionis solertia, ad præclaram adolescentulorum indolem adiuun-  
cta effectum est, ut non aui magis uoluntate, quam ingenti ue-  
stro consensu ac fauore, præmaturæ uirtutis præmiis fuerint  
decorati. Et eorum quidem nunc partim armis, partim togæ mu-  
neribus & uestro Patres, & maximorum Principum de ipsis ius  
diciis ac beneficiis egregie respondent. Hæc ego de popularibus  
quibusdam ( ut ita dixerim ) Farnesi uirtutibus, tam breuiter  
perstrinxi: aut summis potius ( quod aiunt ) labris degustauī:  
quod non uobis tantum nota sunt omnia: sed urbanæ etiam ac  
peregrinæ multitudinis sermonibus celebrata: Quodque tanto  
plura supersunt tantoque ampliora, ut ualde uerear, ne si omnia  
colligere conatus fuero, ac non multo plurima tacite recordationi  
uestre reliquero, non diligentior, sed supersticiosior quodammo-  
do uideri possim: qui magna hæc quidem per se, longo sane in-  
teruallo maioribus, quæ de Paulo Pont. Max. commemoran-  
da sunt, minora, non quasi transiliens atq; omnino missa faciens,  
ex hoc

ex hoc loco iam pedem proferam, & suscepto tandem operi legem ac modum statuam. Quare ne quis orationem meam nimis late uagantem, numisq: in multas dissectam particulas fastidiat, aut stomachetur potius, de multis & maxime laudabilibus Farnesi uirtutibus, meum Patres silentium æqui boni faciat, uos obsecro. Nihil enim agam de singulari eius uiri in rebus circumspectis solertia, in bonis expetendis & contrariis uitandis ac fugiendis providentia: quibus in rebus cum dominari constanti omnium opinione crederetur, Christianæ Reipublicæ & Romæ in primis curiæ oraculum prope quoddam habebatur: Solus enim & quæ euentura essent, è certis rerum principiis, multo ante quasi præagere, & si ita opus foret, præcauere ac propulsare, tum admirabili uir ingenii ac celeritate, tum iudicii exacta quadam subtilitate posse uidebatur. De sublimium rerum appetitione, & humilium contemptu, Deque firmissimo animi robore cum in periculis adeundis, tum aduersis in rebus fortiter & constanter perferendis, Ac simul de ea quam quouis tempore admirabilem præ se tulit, in magnis & præclaris operibus suscipiendis & aggrediendis magnificentia, nihil omnino in præsentia loquor: Quod tamen si fuerunt hæc laudes perpetuo illi uitæ comites, ideo tamen quia tanquam regie atque heroicæ uirtutes inter ceteras eminent, poterunt eæ inter Pontificatus acta aptius cadere & insignius (ut ita dicam) interlucere, Nam quæ adhuc de eo à me dicta sunt, & si tacito uestro omnium consensu comprobari debuisse nihil dubito, nudis ta-

men



men rerum uocibus enumerata, non factorum sunt ad singula uirtutum genera adiunctione illustrata. Quod si Patres, huius funeris oratione decorandi munus, paratiores & omni dicendi facultate eminentiores uiri suscepissent: quanto hæc illi quæ ego tenuitur pro ingenii, memoriæque meæ imbecillitate delibauī, omnia uberius, ac magnificentius egissent? Quam grauitèr illi, quo uerborum & sententiarum ornatu, quo spiritu, qua uoce, quo oris & linguae sono debitum Farnesio quamplurimarum uirtutum testimonium dedissent? At me, ut quæ illi consecuti dicendo fuissent, ne conari quidem audeam, terret uirium mearum conscientia: terret ob exercitationis insolentiam, loci huius amplitudo, confessusque uestri maiestas. Mentem obruit rerum ea congeries, quam ne longissimi quidem temporis, ne dum tam subita tamque paucorum dierum comprehensura fuerit meditatio. Omnis uero conatus mei impetum debilitat, & infringit, ex orbitatis nostræ recordatione animi angor. à quo, & si cursus atque incitatio orationis cogitationem nonnunquam aufert: quoties tamen ad uestras, Patres, lachrymas, ad ferales istas publici luctus significationes oculos refero, toties rediuiua quadam doloris aggressionē opprimi me, & confici sentio: Atque eo impatientius doleo: quo uisior communis huius doloris causa menti obuersatur. Fingamus enim animis, non Paulum. III. Pont. Max. sed Alexandrum Farnesium Cardinalem, Hostiensem Pont. Senatus Principem lugeri: Si tam uitæ dignitatem per quam in qualibet sue ætatis parte, antequam Pont. Max. fieret, tantum nominis & gloriæ adeptus fuerat: grata memorique recordatione

com-

complectamur, an quavis publici luctus & mæroris significatione non existimemus eius funus celebrandum, cuius uita omnis tam fuerit omnibus gentibus ac ciuitatibus, atque uniuersæ Reip. sæpe utilis ac salutaris? Nihil, Patres, facilius credi potest: quam si Cardinalis cum esset, diem suum obisset, omnibus totius Ciuitatis ordinibus teterrimum fuisse atq: acerbissimum illum diem futurum. Parentem alii sibi, fratrem alii, patronum multi, Cardinalem omnes, qualem nulla unquam ætas aut meliorem, aut omni laudum genere præstantiorem protulisset, ex oculis sublatum suis, multis essent lachrymis, ingenti luctu ac mærore testati. At quanto nunc iustius uos eius, Patres, obitum deploratis, qui cum uobis pater semper fuisset optimus, ac amantissimus, Fratres uos tamen & more maiorum nominabat, & fraterna quadam facilitate atque humanitate sibi uos cotidie deuinciebat? Qui cum ad eas quas constantissime coluerat, dum inferiore esset loco uirtutes, heroicæ ac plane Pontificiæ gloriæ cumulum omnem addidisset: quis non quasi diuinitatis quendam sibi solem ereptum, non egerrime ferat? aut quis penitus, atque intimis sensibus conceptum dolorem, ut per gemitus, lamenta & ploratum non erumpat, comprimere ualeat? Verum enimvero, si pium fasque est, Patres, abducamus à luctu tantisper cogitationem, & lachrymis tantillum subtrahamus temporis; dum non maioris iam Alexandri Farnesii Cardinalis, sed Pauli .III. Pont. Max. acta, non copiosa magis & pro rei dignitate ampla atque uberi oratione, quam simplici quadam & illaborata pii doloris testificatione percensemus. Hic ego Patres,

rerum

rerum à Pont. uestro Max. gestarum tanta me mole obruissentio, ut in summa ac prope immensa copia & uarietate faiscas quodammodo mens, & huc illuc dum errabunda uagatur, nuppiam consistat: Quin abortis confusiois ueluti cuiusdam tenebris nullum uel ad ordinandas, uel ad continuandas ac conne-ctendas orationis partes meditationi meae lumen praeferat. Quare quod me omnium conturbat maxime, etiam si principium in promptu fuerit, non continuo tamen mihi posse uideor, satis certum dicendi exitum reperire. Sedenim eum in amplissimum huius Pontificatus campum, spatiosum illum quidem omnium in omni postera etate oratorum & scriptorum ingeniis, officiosius multo & obedientius, quam consultius descenderim, ita spatium in eo meum conficiam, ut cum rerum summas eodem quo sum exorsus, breuitatis ac celeritatis cursu persequi conatus fuero, tacitis expectationibus uestris multa potius à me praetermissa requiratis, quam immodice uos orationis ulla facietate affectos conqueramini. Id unum uos obsecro per uestri amplissimi ordinis Maiestatem, per sanctissimas hasce aras atq; focos, utriusque confessus Patres amplissimi, Regum ac Rerum publicarum legati qui adestis, Postremo omnes cuiuscunque ordinis uiri clarissimi atq; ornatissimi, ut meae in dicendo facultatis inbecillitatem, uestra humanitate atque aequitate fulciatis, et rei magnitudine territam percussamque pene mentem, tum aurium, tum animarum multo maxime benignitate subleuetis atq; erigatis. Quam longe, lateq; Christianae Reip. nomen patet, ad omnes orbis terrae partes de summi iuri, ac uerius herois non

Pontificatus

Pontificatu solum, sed ipsa etiam æternitate dignissimis laudibus fama peruasera: Augebat eam consentiens populorum prædicatio: Confirmabat cotidiana nouorum in alias atq: alias gentes, ac nationes officiorum accessio. Cum Clemente. VII. uitæ muneribus perfuncto, unus qui Reip. gubernacula teneret, Collegarum omnium suorum in hunc eundem conspirantium suffragiis dignissimus est habitus. Quare non ut sæpe & legimus, & ex natu maiorum sermonibus accepimus accidisse (atque ut non in noui Pontificis creatione accidat, uestræ fuerit Patres, prudentiæ ac bonitatis præcauere) tunc longius duci ac per dissidia partium protrahi comitia quidquam necesse fuit. Vna est mora interposita: dum exequiarum iusta Clementi fierent; atque exinde more maiorum totum simul collegium se intra illa septa, quod conclaue appellamus reciperet, eo ipso die, quin ea ipsa pene hora, collegæ omnes ad Farnesum pedes accedentes, atque una omnes uoce Pontificem eum salutantes, communi prius concursu & gratulatione, mox cum uultu omnium et uoce consentientibus tabellarum punctis, & sua perpetua, & omnium Reip. partium iudicia comprobarunt. Ad cunctas iam Reip. partes faustissimæ huius renunciationis nuncii peruenerant, & PAULI. III. nomen letissimis uocibus celebrari, ac maxime effusis plausibus, et gratulationum exquisitis significationibus in cælum attolli cœptum fuerat: Ornatisimæ à maximis regibus & florentissimis ciuitatibus misse legationes, maxima earum quælibet pro summo officii sui declarandi studio, suscepta celeritate, unicuique totius Reip. parentem agnouerant, salutauerant, adorauerant.

Pontifex  
creatur

D Cum

Cum ille non retinendis modo, sed augendis atque illustrandis earum, de quibus ante locuti sumus, uirtutum operibus, nouis uero & plane Pontificiis ingentium quarundam laudum meritis adiungendis, facile declarauit, se unum, qui & tanto patrum consensu crearetur, quique tanto omnium gentium ac nationum plausu Pontificatum iniret, dignissimum fuisse. Atque omnino perfecit, ut Pontificia cognomina non sibi ei quidam supremi honoris tituli, sed bene ac laudabiliter factorum testes, atque indices haberentur. Sanctissimum enim, quod est Dei obseruantissimum, eidemque Deo carissimum, euentorum felicitas, Beatissimum, omnibus numeris absoluta, ac propriis nitens & contenta bonis uita, maximum, præclara ac plane diuinæ quædam in rebus omnibus exequendis facultates, iure ac merito appellari eum debuisse, ut cuncti mortales sibi persuasum haberent, haud dubie effecerunt. Sed ad Pontificatus acta mea mox accedet oratio, si prius uos illud Patres monero, non esse me singula ad certa uirtutum nomina quasi certa capita relaturum. Nam cum præclara quædam sit, & admirabilis ac planè diuina humane mentis uis, quam sapientiam uocamus, ea humane uitæ laudum omnium quasi chorum efficit: Ab ea omnis recte sentiendi, intelligendi atque agendi, Ab ea etiam bene atque ad res accommodate dicendi omnis disciplina ortum ducit: Atque hinc illa morum certissima lex, & regula uirtutum earum, à quibus omnis nostra actio proficiscitur, dux prudentia existit: sine qua fortitudo, iustitia, fides, clementia, animi moderatio, uel alius postremo quicui bene comparati & constituti animi habitus,

habitus, in homine aut nullus omnino spectari, aut certe exiliter ac tenuiter potest elucere. Satis itaque Patres habuero, sed dum in rerum à PAULO gestarum commemoratione uersabor, ostendero quanta fuerit in consiliis de rebus maximis capiendis sapientia, quanta in gerendis prudentia. Ex eo enim et illud facile colligi poterit, fuisse cœlestem illum fauorem, quam felicitatem et bonum euentum nominamus, uiri post homines natos maximi, sapientiæ ac prudentiæ, non fortune tribuendū. Et quoniam certissima ac sempiterna præpotentis Dei lege, eam Christianæ professionis communionem, quam ecclesiam dicimus, cum ciuili Rep. tanquam spiritum in omni animante naturæ cum corpore, in humana, cum spiritu mentem, coniungi oportuit; ex ipsa Pauli factorum operumque serie, modo Iesu Christi seruatoris nostri summum legatum, et pro geminis ueræ religionis propugnatoribus Petro atque eo, cuius sibi consulto nomen adsciuit Paulo, sacrorum uindictam atque Antistitem, modo uero traditi à Constantino Syluestro atque iis, qui deinceps Syluestro successerunt, imperii defensorem et gubernatorem optimum ac generosissimum agnoscetis. Atque omnino qui in Rep. non dignitatis magis atque honoris, quam uirtutum et omnis liberalis cognitionis principatum obtinetis, quodnam Pont. uestri Max. factum, uel cum pulcherrimo illo et maxime diuino pietatis, sanctitatis ac religionis nexu coniunctum fuerit, uel à quo præcipue totius decori atque honesti fonte deriuarit, quam facillime tacita uestrum quilibet cogitatione dispiciet. Vestra ego in rebus percipiendis ac diiudicandis solertia, uestra in opti-

mi ac sapientissimi Pont. laudatione auscultanda, pio silentio  
 atque attentione fretus, arbitratu meo institutum eius actorum  
 ordinem persequar. Agebat Paulus, cum Pont. Max. decla-  
 ratus est, annum. LXVII. Ad imminencia tamen Rep. peri-  
 cula propulsanda, cum senili prudentia, atque consilio iuvenilem  
 quandam alacritatem coniungendam putavit: Atque ita om-  
 nia que fieri, quæq; agi oporteret maturanda, ut si per paucos  
 ætatis annos reliquos habuisset, nihil tamen minus quam qui diu-  
 tissime in Pontificatu uixissent, de Rep. benemeritis uideri pos-  
 set. Sin è uita (quod maximum præpotenti Deo beneficium de-  
 buimus) serius quam tunc speranimus excessisset, multorum  
 Pontificum Max. uniuersam gloriam unus longo interuallo su-  
 peraret. Sed quæ tandem eius Pontificia acta fuerunt? Quæ  
 ad Dei cultum pertinuerunt primum colligam. Nam cum omni-  
 bus imperiis haud dubie religio salutem apportet, & à propitijs  
 ac placatis numinibus mutue fidei firmitas, & incolumitatis ac  
 securitatis certissima spes sese in hominum animis corroboret,  
 Merito, iacto hoc sui Pontificatus fundamento, & ut beati es-  
 sent, qui in ipsius essent imperio, effecit, Et per quam facile sibi  
 ad immortalitatem uiam muniuit. Hac in parte talis fuit Pau-  
 lus, ut post Syluestrum, Leonem, Caium, Gregorium, Cælesti-  
 num, qui postremi fere Pontificum Max. in diuorum suere pro-  
 uitæ sanctitate numerum relati, nemo accuratius, nemo uigilan-  
 tius boni sacrorum principis, fidelis pastoris, seduli ac solertis hu-  
 manorum animorum tutoris officio functus fuerit. Sacra enim  
 is ut per minores Pontifices, & quosuis sacerdotum ordines ubi-  
 cunq;

Pontifica-  
 tus acta.

Religio-  
 nis curæ.



cumq; Christianum nomen uigeret, uite pureq; fierent, diligentissi-  
me curauit. Nullum in urbe fuit priscæ atq; augustioris religio-  
nis delubrum, in quo non sæpe ipse rei diuinæ præfuerit. Sta-  
tas certe solennesq; carimonias nisi cum forte langueret, nun-  
quam intermisit. Iam uero qua ille caritate deuotarum Deo fa-  
miliarum egestatem subleuauit? Quam pia beneficentia eius  
quod Iesu nomine celebratur, atq; in dies longe lateq; per Italiæ  
atq; Europæ ciuitates propagatur, laudatissimæ uitæ fratrum  
collegium profecutus est? Quam misericorditer parentibus ac  
fortunis orbatu pueri & uirgines, ut publice alerentur atq; ad ci-  
uilibus uitæ munia educerentur, instituit? Iure igitur uos pueri san-  
ctissimi Pontificis alumni, funebres preces uestras singulti-  
bus interpellantes alteram hanc orbitatem lugetis. Priorem ue-  
strum plurimi nix dum nati, aut certe paruuli infantes amisistis,  
uel ne sensistis quidem. Hunc non communem tantum, sed ue-  
strum ipsorum proprium parentem agnoscebatis. Sed pergit in-  
sta facere, pergit tam de uobis benemerito parēti parentare. Ve-  
stra illam pietas iam Deo gratiosiorē reddit. Illius mox sanctitas  
Dei uobis numē conciliabit. Atq; ut in eo, qui successerit, Pauli bo-  
nitate ac misericordiā minus desideretis, efficiet. Conuertit me Pa-  
tres in diuersa tēpli parte nō magis sacrū, quā lugubre carnē con-  
cinentiū puerorū uox. Redeo ad religiosa Pauli acta. Quā illud  
ad exorandā Dei clementiā efficax esse debuit? Quod cū propter  
diras illas urbis calamitates et populorū defectiones, exhaustum  
et uacuu omniū copiis ærariū, ablatus annuis uectigalibus, nudā  
et omni ope spoliatā Rep. offendisset, ingētes et maxime necessarij  
de qui-



de quibus alio loco dicemus, essent cotidie sumptus tolerandi, relatis à misericordium largitionum dispensatore, uiro integerrimo rationibus, innumerabilis & incredibilis quedam pecuniæ summa, cum ad egentium miseras alleuandas, tum ad nobiles ex infima plebe uirgines collocandas erogata reperiatur. Qui tam liberalis in pauperes fuerit, quanta is fuit in Christum, Deum scilicet ipsum, obseruantia? Cum ipsemet omnis misericordiæ & benignitatis fons Christus, ipsa ueritatis uoce, sibi eos benigne facere, qui pauperibus benigne facerent, affirmarit. Magnum hoc & præclarum, quoque minus in propatulo gestum est, eo pleniore uoce, & magis illustri prædicatione dignandum. Illustria enim illustrium uirorum merita uulgo quæ nota sunt, ne temporis diuturnitate obscurentur, hominum uitæ conducit ad posteritatis memoriam prodere. Et quæ dum fierent, quanto dissimulantiùs facta fuere, maiorem pietatis laudem meruerunt, ea, si qui rescierit, non magis ad auctoris laudem, quam ad imitationis exemplum in lucem non protulerit, neque ingrati ille, neque inuidi animi crimine carere merito iudicetur. Sed ad ea, quæ palam fuerunt hominum oculis, aut auribus exposita, quæque occulte geri non potuerunt, religionis opera reuocetur oratio. Quid uero tam laudabile, tam ad hominum salutem, & beatæ uitæ rationem accommodatum, tam Pontificale, tam cum Christi seruatoris nostri iussis congruens, quam quod cogitationes, consilia, studiaque sua omnia ad pacem inter summos Reip. principes conciliandam conuertit. Didicerat nempe cum ex sapientissimorum hominum sententiis, tum uero maxime ex diuinarum uocum moni-

Pacis studium.

monimētis, pacis ui & natura omnem humane uite felicitatem,  
 omnem promissē à Deo immortalitatis spem contineri. Sciebat  
 ē discordia & disidiis, magnorum semper imperiorum perniciem  
 atque exitium extitisse. Uiderat in magnis totius Reipub. ac to-  
 tius Italiae atque ipsius urbis cladibus, ob graues & fœdas prin-  
 cipum inimicitias diuina atque humana iura uiolari, sacra pro-  
 phanari, prophana ferri, agi, rapi crudeliter ac miserabiliter.  
 Animaduertat ac pene suis oculis inspectarat, seuum illum  
 & præferocem, nominis legumque nostrarum hostem sempiter-  
 num Turcarum Tyrannum, captatis atque obseruatis ciuiliū,  
 quæ inter se Christiani gererent, bellorum motibus, dum odiis  
 atrocissimis incensi, uel de finibus imperiū, uel de iure regnorum  
 disceptarent ac digladiarentur, Christianæ Reipub. ualidissimis  
 propugnaculis. Rhodo & Tauruno expugnatis, capta uniuerſa  
 inferiore Pannonia, maximas equitum peditumque copias iam  
 bis in Pannoniam superiorem, apparatissimas instructissimasq:  
 prædonum classes, ad utranque maris nostri oram populandam  
 atque opprimendam immisisse. Præsentissimum igitur ad sanan-  
 da Reip. uulnera, atque ad Turcicam pestem depellendam reme-  
 dium esse arbitratus, si maximī ac potentissimi duo Reges, Ca-  
 rolus. v. Imperator, & Franciscus. i. Galliarum Rex in gratiam  
 redissent, & amicitia firmoque fœdere coniuncti, aut arma po-  
 fuissent, aut in communem hostem optimis auspiciis conuertissent,  
 Nisi de pace legatis semel & iterum, spectatissime grauitatis  
 atque auctoritatis ē uestro, Patres, collegio uiris, cum minus  
 multo quam uellet, quamque opus esset, pròfectum intelligeret,

Quod

Nicæam  
profectus

Quod ad tam graues tamque inueteratas offensiones ac simulta-  
tes, noua quædam, ac minus usitata medelarum genera erant ad-  
hibenda ac sæpius nouanda atque instauranda, ea dum adhibet,  
quibus sanctissimus ac sapientiss. Pont. non rationibus, quibus  
iustis piisque precibus ac deprecationibus non contendit? Cum  
tam grauis annis ipsemet Nicæam usque profectus, in Caroli  
ipsius Caesaris, et Francisci Regis, (ambos amplitudinis & Maie-  
statis causa nomino) congressum & colloquium uenerit? Nam  
cum biennio ante, redeuntem confecto punico bello Caesarem in  
urbe triumphali cum pompa acceperat, & ex eius sermonibus  
perspexisset, non fore difficultatum utranque Regem ab omni  
iræ acerbitate ad placabilitatem & lenitatem reuocare, modo ut  
congrederentur familiarius, eorumque ipse congressibus & sermo-  
nibus interesset, ei quam de pace conceperat spei, Reip. ductus ca-  
ritate, & acerrimis religionis tuendæ aculeis incitatus, omnem  
ualetudinem, quin uitam potius ipsam censuit condonandam. Tis-  
lit uero longi atque incommodi itineris optatissimum fructum.  
Perfecit enim cum rationum ui, tum mitissimæ orationis lenita-  
te, & pertractandorum animorum peritia, ut pactis in annos. x.  
induciis, tantas ac tam certas inter se coniunctionis significatio-  
nes illi reges dederint, ut qui ocium ac tranquillitatem expete-  
rent, illas uerbo inducias, pacem re futuram augurarentur: et quæ  
rerum essent nouarum cupidiore, ad nouas iam artes turbandi  
ac rescindendi omnia, se inuestigandas compararent. Non desti-  
tit Paulus, cum eodem cuius certissimum fuerat numen secutus,  
Deo reducente in urbem redisset, omni studio & conatu suo ex-  
periri,

periri, eniti, elaborare, ut omnem quæ adhuc reliqua esset, odio-  
rum scintillam restingueret: omnem discordiarum omnium me-  
morian sempiterna obliuione deleret. Quare quadriennio post,  
ultra ad Carolam Imp. Lucam uenit, ut sua apud eum auctori-  
tate conglutinata illam concordiam arctius astringeret, & ia-  
Et a pacis fundamenta, seditioforum nequitia ne conuellerentur, Ad Caro-  
lum Imp.  
Lucā pro  
fectus.  
obstiteret. Duo tantum mediū anni fuerunt: cum iam tertio ea-  
dem de causa ex urbe profectus, Buxeti ad constitutum collo-  
quio diem, eidem Imperatori, quo eum in pristina sententia con-  
firmaret, præsto fuit. Si hæc apud eos, Patres, dicerentur, qui non  
ipsi, sicuti uestrum pars maxima, rebus omnibus interfuisent,  
quibusq; hæc audita tantum, non præsentium oculis fuissent ex-  
posita, An illi non fingi omnia ad Pauli uitam exornandam,  
non ad rei gestæ ueritatem exponendam commemorari putarent?  
Quid enim creditu minus facile, quam hominem qui in toga atq;  
in ciuilibus duntaxat officiis, inter sacra et religionis cæremonias  
ætatem totam exegisset, iam septuagenarium & eo etiam natu  
grandiorem, in magnis anni caloribus, per asperrimos Apenni-  
ni tramites, in extremos Liguriæ fines, & ad maritimas alpes con-  
tendere non dubitasse? Et eundem ex annorum quinque inter-  
uallo bis, inualidum, ulera uires, sortemque senectæ ( ut Poeta in-  
quit ) ab urbe in Hetruriam & medias citerioris Galliæ urbes  
excurrisse? Hoc quis unquam tam grandis natu Pont. Max.  
fecit? Aut quis in expeditionibus Imperator, in armis miles, in-  
re nautica gubernator consenuit? Quis tam gelu, uel æstu obdu-  
ruit, Qui id ætatis à longinquis itineribus non abhorruerit? Non

E diuum,

diuum hominumque concessu senectuti suæ ocium ac quietem  
 indulserit? At Paulus de se nihil fuit sollicitus, modo ut per se  
 salua esset Resp. quam per se, atque eam solam, quam ipse co-  
 ram constituisset ac firmasset concordiam, saluam fore confide-  
 re sibi posse uidebatur. Vicit igitur omnem periculorum ratio-  
 nem perpetua erga commissos fidei suæ populos caritas, spei ala-  
 critas, laborem minuit. Religionis ardor, uicæ & insensarum ple-  
 runque tempestatum incommodationem non patienter tantum,  
 sed hilare etiam & iucunde sustinuit. O uirum prisca illa piete-  
 te ac fide flagrantem. O memorandum omnibus gentibus ac se-  
 culis pacis studium. Quo sane merito uix in priscis illis quidam  
 Pontificibus, Lino, Cleto, Anacleto, Telesphoro, Urbano, Feli-  
 ce, Clemente, Marcellino, cæterisque qui sanguine profuso, suam  
 posteris in Christiana professione constantiam testatam relinque-  
 runt, maius ullum potuerit prædicari. Merito itaque quacunque  
 iter Paulus faceret, omnis ad tam pium, tanque uniuersum com-  
 munitatis ocium ac tranquillitatis parentem, quasi è cælo delapsus esset,  
 cum admiratione incredibili inspectandum, è uicis, oppidis & ur-  
 bibus undique, in agros & uias multitudo se effundebat. Exul-  
 tantes gaudio omnis oppidanorum atque agricolarum turba. Ma-  
 tronæ cum pueris & uirginibus, cuiusvis ordinis atque ætatis uiri  
 Oleæ frondem præferentes, relicte à Christo hereditatis, Chri-  
 stianæ Reip. ipsius nempe pacis uindicem, & sacrosanctæ per pa-  
 cem potissimum religionis in pristinum decus ac dignitatem resti-  
 tuendæ auctorem salutabant: optimum commissi gregis pasto-  
 rem, communem ac uerum Christianorum omnium regum & po-  
 pulorum

pulorum patronum appellabant: letis uocibus ac festis plaufibus itinera, cogitationes, colloquia, actiones profequebantur: secunda omnia, uitæ in primis quam maxime longinqua spacia, salutem, incolumitatem, felicem reditum precabantur. Non audita commemoro: ipse ter eius itinerum comes fui, & sane nihil à me fingi & uestrum Patres, pars fere maxima, & tacita mea ipsius mihi testis est recordatio. Quid uero Paulus, ut his omnibus, huic de se hominum expectationi accumulate responderet, non molitus est? non egit? non contendit? adeundi fuerunt reges, adiit, inter esse ac præesse eorum colloquiis oportuit, interfuit, præfuit: fuit reditus in gratiam exorandus, exorauit. At non fuit ille quidem quam debuit perpetuus ac diuturnus. Quis nescit ingentes plerumque molitiones siue artis illæ, siue naturæ fuerint, extraneo aliquo & aduentitio impetu subito dirui ac subuerti posse? Magna & præclara hominum opera, præcelsa urbium mania, iactas in numerabili manu moles repentini telluris motus sæpe demoliti sunt. Aut subita quæpiam maris illuies, aut inopinata late de hiscentis soli uoragines non ingentes tantum campos, sed summa etiam montium iuga absorbuerunt. Nulla est tanta cuiusuis rei uis, nullus tam uehemens impetus, qui cum humanæ linguae potestate comparari possit, ea si facultate sua ad animorum coniunctiones disiungendas abutatur, nulla reperiri potest tanta mentis aut consilii stabilitate firmata concordia, quæ maleuolorum ac factiosorum hominum uocibus, & non publici boni, sed suorum duntaxat commodorum sat agentium sermonibus labefactari & conuelli nequeat. Quid igitur? ubi uidit tot ac tantos labo-



res suos, tantas animi corporisq: contentiones, certorum hominum improbitatem ne dicam, an potius impietatem? irritas fecisse, ac non modo uniuersum Reip. corpus per salutaria pacis remedia pristinam sanitatem non recipere, sed in dies etiam furiali seditionum ueneno, alia atque insuper alia membra extabescere, non protinus animum despondit, aut de pace spem abiecit. Nullum enim unquam tempus remisit, quin per legatos ab illa falsarum opinionum insaniâ & bellici furoris amentia, principum animos auocare atque abstertere conatus fuerit. Quoties instructas ad prælium acies, quoties collata iam prope signa, Pauli legationes diremerunt? Quoties infestissimorum & ad mutuam cladem paratissimorum exercituum tela, à Christianorum iugulis & ceru-

Bellum in  
Turcas a-  
uersum.

cibus modo in Turcas, modo in Pænos auerterunt? Turcicum uero bellum eius in primis hortatu & impulsu susceptum, ac terramarique ingenti apparatu gestum est: Triremes quam multas non alius quisquam Pont. Max. sub certo Imperatore suo misit: Maritimas Terreſtresq: copias magno impendio, in summa æuarii tenuitate tandiu aluit, usque dum Cæsar Tunctum expugnaret: A Vienna uero mœnibus, & à superi maris littore insolentissimus atq: impotentissimus hostis, qui aulone in Italiam numerosissimæ classis transmissionem moliebatur, intra suos ipsius fines repelleretur. Interea uero cum eiusdem hostis nequo cotidianaſ infidias cauere, neque in dies magis inualeſcentis ac se corroborantis impetus aliter sustineri posse compertum haberet, quam si bellicosissimæ Germaniæ gentes ac populi, quæ per seditiones, atque intestinas discordias, perque maxime impias de toto religio-

nis iure disceptationes, à Dei primum numine, deinde à suorum  
 etiam principum imperiis descuerant, à cæco mentis errore abdu-  
 cti furere iam desinerent, & ad ueram atque à maioribus tradi-  
 tam, Dei sancte pureque colendi rationem reuocarentur, ad uni-  
 uersum Christianæ Reipub. concilium, quod iam tum uix dum  
 Pont. creatus, indixerat celebrandum, omni cura, studio, animi  
 contentione incubuit. Non erant profecto in dubium ac in no-  
 uam controuersiam denuo reuocanda, quæ de omni religionis iure  
 ac forma, deque iis quibus religio ipsa contineretur quæstionibus,  
 de sacerdotum uita & moribus, de tota Antistitum, atq; ipsius  
 Pont. Max. potestate atque auctoritate, in tam multis conci-  
 liis disceptata ac constituta fuissent, & in iis quatuor maxime;  
 quorum decreta maiores nostri nō minore fere dignatione, quam  
 ipsius Dei & hominis uoces æstimanda censuissent. Est consul-  
 tandi atque ambigendi locus, cum in rebus neque discussis, neque  
 conclusis assensionem omnem expedit sustinere. At quæ grauissi-  
 morum uirorum & optime de Christiana professione meritorum  
 sæpe sententiis, suo sæpe ipsorum etiam sanguine sancitæ iam pri-  
 dem essent deliberationes, non iam opinionum concertationibus,  
 sed perpetua in obseruando atque obediendo fuerunt perseueran-  
 tia prosequendæ. At id illi ut populi, illi ut perniciosarum sedi-  
 tionum auctores facerent, cum perductum iri nunquam posse sa-  
 tis iam exploratum & cognitum haberet, eam quam essent æ-  
 relissime amplexati, non libere, sed licenter, non impure, sed in-  
 pie uiuendi impunitatem optimas Pont. tanquam Clemens medi-  
 cus, non ui & armis, quasi uitiatas & corruptas corporis partes,  
 ferro,

Conciliū  
 indictū &  
 celebratū



ferro, & aduſtione cohercendam: ſed ea, quam ipſi ſmet ſacra  
ueluti anchoram ſuarum ſeceſſionum habere ſe ſtimulabant, ſola  
nouī concilii auctōratione eorum uecordiæ atque amentię frenum  
ueritatis (ut ita dixerim) iniiciendum cenſuit. Antuam itaque  
primum celebrando concilio locum elegerat: Quę urbs conuenis  
omnibus ſecuritatem ſummam, præterea commeatus & quęuis  
commoda large ſuppeditare poſſe uidebatur. Verum exorti re-  
pente in inſubribus nouarum rerum motus, in loco ſtatuendo ſen-  
ſentiã ut mutaret, effecerunt. Quare Vicetię rurfus indixit, cum  
reliquam commoditatem, tum uero maxime ſoli ubertatem & cœ-  
li ſalubritatem ſecutus. Deinde, quo ex omnibus Germaniæ ciui-  
tatibus, à quibus erat illa diſſenſionum peſtis depellenda, minus  
grauate pro loci uicinitate quam uellent multi conuenirent, non  
finitimum tantum illis oppidum, ſed quod in Germanorum prin-  
cipum ditione erat, maxime fidum atque hoſpitale Tridentum  
conſtituit: Eo uti prius Vicetiam, & legatos ſuos è ueſtro Pa-  
tres collegio uitę dignitate, & cum omni literarum ſcientia, tum  
diuini humanique iuris prudentia præſtantiſſimos, alios ac ſubin-  
de alios miſit: Eo magnum minorum Pontificum numerum di-  
miſſis per Europam ad ultimas uſq: terras nunciis, in unum con-  
gregauit: Eo Germanicarum ſectarum principes, nouarum reli-  
gionum auctōres & profeſſores creberrimis adhortationibus, pa-  
ternis precibus & cotidianis ſuaſionibus ut aduocaret, emixiſ-  
ſime operam dedit: Sed cum illi peruerſiſſimarum opinionum per-  
tinacia obdurati modo cauſarentur, modo tergiuerſarentur, mo-  
do maledictis & contumeliis tam piam, tam ſalutarem, quamque  
ipſi

ipsi per tot annos, quasi maxime necessariam efflagitarant, actio-  
 nem eluderent, ubi uidet eos quos ad diem dictum adfore uix ut  
 dubitaret, adduci poterat, frustra iam triennium expectari, atq;  
 interea sumptibus intolerabilibus Reip. rationes onerari, non ef-  
 se tot Pontificum, qui ex aliis, atque aliis orbis terræ partibus, à  
 Gothis usq; & Hibernis, quin Aethiopibus & Indis, Ac prius  
 etiam nobis incognitis, paucis uero ante annis, Hispanorum Lusi-  
 tanorumque solertia repertis in Oceano Insulis Tridentum con-  
 uenerant, patientia abutendum statuit. Mandat itaque per lite-  
 ras ac nuncios legatis suis collegis uestris, Montio, Ceruino, Po-  
 lo, uiris optimis & grauissimis, atque omnino quorum uicaria in  
 tanto negotio ueretur opera dignissimis, certis ac statis diebus  
 Patres in curiam ut uocent: Ibiq; singulis confesibus res ad re-  
 ligionis Reiquepub. summam pertinentes, more rituque à maiori  
 bus tradito referuntur: Sententiæ grauissimæ atque ornatissimæ  
 dicuntur: Senatus consulta magna cum auctoritate perscribun-  
 tur. Iam prope erat ut sua tanto operi clausula adderetur, cum  
 repente propter loci angustias (ut in conferta inquilinorum tur-  
 ba par fuit) pestilenti morbi contagione, non tantum ignota ten-  
 tari capita, sed cotidie illustrium etiam uirorum funera duci cæ-  
 pta sunt. Noua igitur fuit concilio sedes deligenda. Aptissima  
 uisa est Bononia, & quod non longius quam quatruidi abesset,  
 & quod omnem quæ illuc conuemsset multitudinem soli bonita-  
 te alere, & domorum laxitate facile possit capere. Hospitalior  
 uero gentibus ac nationibus urbs profecto nulla: Nam & opti-  
 morum studiorum domicilium, & bonarum artium altrix, &  
 educatrix

educatrix ueluti quædam abhinc mille amplius annos fuit: Et quod loci, quo sua est opportunitate, nulla tam sepe cum Pontificibus Max. Regum atque Imperatorum congressibus & colloquiis patuit, & augustissima eadem semper habita est sanctissimorum fœderum ara. In eam igitur urbem ita curia Tridentina translata est, ut loci mutatione neque quæ ante decreta fuerant in acta referri, neque denuo alia referri unquam intermissum fuerit. Ea fuit Pont. optimi ac sapientissimi in peragendo concilio constantia, & per concilium ab alienatos opinionum peruersitate populos ad Christianæ legis ueritatem reuocandi studium: Tanta flagrauit Christiani nominis conciliandi & consociandi cupiditate, ut neque sumptus magnitudine, quem in alendo magno doctorum hominum numero iam prope totum quinquennium tolerauerat, nō desiderio clarissimorum uirorum, quorum cotidiana opera atque officio carere uix poterat, non potremo pestilentie imminenti periculo, à pulcherrimi operis progressu reuocari aut deterreri potuerit. Magna hæc sunt confirmati in tuenda ac redintegranda religione animi documenta. Sed quid tandem dicat aliquis hi tantarum actionum conatus Reip. profuerunt? Districti iam Christianorum in Christianos gladii, non propterea ab ipso quasi Christianæ Reip. corpore auersi sunt. Est certe his Pauli consiliis eatenus profectum, quod pestis & discordiarum perniciēs omnis, est ad extremos artus à precordiis et reliquis uitæ certissimis sedibus reiecta. Nec uero qui summa quæ sunt in quouis rerum genere, assequi non potuit, non summe proximam laudem, quin & summam quantum in ipso fuit, mereatur,

moreatur, si cum ad optima quæque & maxime salutaria aspirarit, quæ optimis proxima sint, saltem fuerit consecutus. Vnum mihi restat de Pontificiis PAULI actis memorandum, antequam ad eas uenio laudes, quæ non magis Pontificibus Maximis propriæ sunt, quam in aliis inferioris etiam gradus principibus, non illæ quidem frequentes & cotidianæ, sed quæ optari certe, & ab iis qui in eorum sunt imperio, maxime expeti solite sunt. Est uero id, & ad præsentium oculos atque animos memorabile, & ad posteritatis memoriam tam insigne, ut eius magnitudine tota orationis meæ uis debilitetur. In eo ego & quod rei ponderi iam prope succumbo, paucis immorabor: Et simul quod cum uestris Patres coniunctum est laudibus, uestramque quam proxime dignitatem contingit, meæ uestri pudoris uerecundiæ dicendi breuitate consulam. Estis uos Patres sanctissimum Christianæ Reipub. consilium. Certa uos estis & splendidissima terrarum lumina, atque ut appellamini, sacrosanctæ Rom. Ecclesiæ Cardines: Quod scilicet uestri huius longe grauissimi, atque ornatissimi senatus auctoritate ac sententiis, tanquam firmissimis Cardinibus, relicta à CHRISTO Apostolis, idest legatis suis, Reip. salus atque incolumitas nititur ac sustentatur. Quanto uero uestra ista supremæ dignitatis insignia, fasces, laticeclauis, atque apicis purpura, ordinis ac sessionis primatus, & ad speciem sunt quam cæterorum orbis terræ Principum ornatus illustriora, & ad religionis ac maiestatis decus augustiora, tanto uos profecto decet non solum generis claritate, sed morum probitate, uitæ integritate, ingenio, uirtute, sapientia, at-

F que

De Cardi  
naliū crea  
tione.

que omni doctrine genere, cæteros omnes publicorum consilio-  
rum auctores antecellere. Animaduersum uero est omnibus tem-  
poribus, hanc ipsam Remp. uestram post acceptum à Constanti-  
no Imperium, saluam maxime & florentem fuisse, cum non opti-  
mum tantum Pont. Max. sed simillimos etiam Pont. Maximi  
consiliarios, selectos scilicet uestri loci atque ordinis uiros, nacta  
fuerit. Hac in parte supplendi quoties oportuit patrum nume-  
rum, & optimum atque honoratissimum quenque hoc honore or-  
nandi atque honestandi, nullius cuiusquam Pont. Max. laus  
tanta fuit, quin eam PAVLI in patribus deligendis iudicium  
adæquarit. De Iulii. I I. collegio iam uix unus & alter, non-  
nulli quos Leo. x. conscripserat, Aliquot quos Clemens, re-  
liqui erant, clari omnes, & quorum in magna temporum uarieta-  
te ualde spectata uirtus fuerat. Eorum sibi quam simillimos con-  
scribendos & cooptandos Paulus censuit. Fuit nobilitas, & na-  
taliū splendor requirendus: Regio multos genere illustres adle-  
git. Fuit uirtuti, fuit uitæ dignitati honos habendus: Ex omni-  
bus Italie, ex omnibus Europæ partibus in uestrum ultro con-  
fessum acciuit atque militauit, quibus uel ipse iam pridem iudica-  
set, uel minime dubia fama attulisset, primas honestatis ac sancti-  
tatis, primas disciplinarum atque optimarum artium laudes de-  
beri. Fuit laboribus pro Repub. susceptis gratia referenda: Mult-  
ti in hunc ordinem sunt adsciti, qui studia, qui fidem, qui fortunas,  
qui etatem totam in magnis & grauib. Reip. negociis ac mune-  
ribus consumpsissent: qui corpus manifestis difficillimorum &  
insidiosorum plerunq. itinerum, longinquarumque legationum pe-  
riculis

riculis obieciſſent: qui uitam deniq: caputq: ſuum ueſtræ Patres curiæ deuouiſſent, ac ſanguinem etiam minime inuiti, dum eius ſalutem & auctoritatem tuerentur, profundere parati fuiſſent. Quæ igitur & quam clara lumina, quæ uiroꝝum decora, ad eos, quos proximi ſuperiores Pontifices reliquiſſent, ex Pauli delectiſſimis acceſſerunt? Preſentium ac uiuentium, ueſtro pudori parcens neminem nomino: Nemo tamen iſtic ſedet, in quo, quæ paulo ante attigi uitæ ornamenta, qui uultus ueſtros atq: ora intueatur, non in ſingulis modo ſingula, aut in omnibus omnia, ſed prope in ſingulis omnia, quamfacillime quamque ueriſſime tacita agnoſcat cogitatione. Sed quæ unquam magnorum & multipliciſſimarum & uirtutum laude cumulatiſſimorum hominum nomina delebit obliuio? Quæ temporum iniquitas, pulcherrimas non corporis, ſed ſuas animorum imagines, quas ipſiſmet æternis conſignarant literarum monimentis, poterit obſcurare? Video Patres, ex mea tam paucis expreſſa uerbis ſignificatione uos commoueri: Credo quod animos ueſtros demortuorum collegarum ueſtrorum, acri quodam cum deſiderio ſubit recordatio, Contareni, Simoneti, Fregoſii, Ginutii, Iacobatii, Aleandri, Bembi, Sadoletti, Corteſii, Ardingelli: quæ illi fuerunt, ſumme DEVS, uitæ exemplaria? quæ ingenii, uirtutum ac doctrinarum lumina? Sed cum ſatis eos iam diu luxerimus, non committam ut refricanda tantorum uiroꝝum memoria, aduentitii doloris cauſam querere, & quaſi obductæ iam cicatrici manus uidear adinouere. Scio ego Patres, ex eorum numero quos PAVLVS adlegiit, alios multos horum quos nominaui, & ueſtri adhuc uiuentium, quamſimilli-



mos è uita excessisse: Verum qui primi cogitationi mee occurrerunt, eorum ego nomina enunciaui. Sed cum diuersis temporibus non pauciores quam .LXXX. ab eo editi fuerint, quem eorum non maxime probastis? quem non dignissimum qui in uestrum numerum adscriberetur, iudicastis? quem iam receptum non fraterno estis amore complexi? Nepotes quidem suos, ALEXAN-

Nepotum  
in colle-  
gium coo-  
ptatio.

DRVM primum Farnesium, et Guidonem Ascaniũ Sfortiam, ex longo deinde intervallo Rhenutium Farnesium uix dum puberes uobis collegas dedit. Sed qua indole adolescentulos? quo ingenio? quam liberaliter? quam præclare institutos? quam supra omnem ætatis captum, cum multa rerum intelligentia, tum mirifica quadam communis sensus præditos excellentia? Et sane eos non modo uobis non recusantibus, sed rogantibus etiam atque efflagitantibus dedit: Et tam uerecunde eos nominauit, ut facile apparuerit, uobis obsequentiore multo, quam nepotes ornandi cupidiorẽ fuisse. Quid uero potuit aut à uobis amantius expeti, aut ab illo elegantius decerni? Fuit hoc uestre erga PAVLVM obseruantie perspicuum argumentum. Fuit ipsius erga uos fidei certissimum pignus, Firmissimum mutue beneuolentie uinculum. Et uero nunquam fuit quamobrem aut uos id expetisse, aut uestris ipsum precibus indulgisse pœniteret. Tales. n. uobis domesticæ disciplinæ institutis atq. exemplis præstitit Paulus: Tales ipsi pro naturæ suæ bonitate euaserunt, ut Pauli nepotes non magis de facie, aut de maximis quos per adolescentes ceperunt, & cum summa omnium ordinum laude gesserunt honoribus, quam de morum & uirtutum præstantia, quasi felices è generosa



nerosa stirpe propagines quivis facile possit agnoscere: Neq; hos modo quos præter auitæ seueritatis reuerentiam, præter ingenii indolem atq; educationis rectissimam rationem, sanctior ista purpura & uestri confessus uerecundia, ab omni uitæ prauitate facile potuit abstergere, & in uirtutum omnium officio, ac ueræ solidæque gloriæ cursu continere. Sed quid Octauus? quid Horatius Farnesii? quid Sfortia Sanctiflorius? ab ipsa pene infantia, armis & uitæ militaris consuetudine assuefacti? Quid unquam non pudenter, non moderate, non ut maxime Romanæ Iuuentutis principes deceret, fecerunt? ordines exercitusq; ita duxerunt, ita imperarunt, ut non ætati ueniam, sed factis prædicationem quaesierint. Priores duo, alter apud Cæsarem, apud Franciscum Gallorum Regem alter, diu fuerunt, et in tanta quidem gratia, ut Octauium Cæsar non magis quod ei filiam nuptum dederit, lectissimam & omni muliebri laude eminentissimam faminam Margaritam Austriam, ut generum diligat, quam uirtutis ergo, non minus prope, quam Philippum Hispaniarum Regem, unicum filium suum, quem maiestatis & celsitatis causa nominari, carum habeat: Horatium Henricus Rex Francisci filius, cui filiam desponderet, dignum duxerit. Sed ut illuc, unde digressa est, redeat oratio. Cum optimum quæq; nobilissimum ac sapientissimum PAVLVS in uestrum collegium cooptarit: tribusque suis nepotibus adscriptis uestræ fuerit assensus cohortationi, facile profecto declarauit, et Pontificis optimi auctoritatem optimis consiliariis muniendâ, & cum Reip. optime consuluit, tum uero et prudenter summam dignitatis uestre habuit ratione, et amanter

Nepotum  
aliorum lau  
des.

Margarita  
Austria.

uestre

uestre erga se maxime pie uoluntati obtemperauit. Ac pulcher  
rimo ille quidem fasti sui tum ex magnorum erga ipsum dum ui-  
ueret, officiorum perpetuitate, tum ex uestro isto pietatis & gra-  
te memorie plenissimo luctu, ex iis uero maxime, que erga suos  
Nepotes pre uobis fertis, minime sane obscuris beneuolentie si-  
gnis, fructus iam tulit optatissimos. Et uos, quos ille tanti honoris  
quasi germanitate quadam, cum ueteribus collegis maximis illis  
quidem & clarissimis uiris coniunxit, magnam pro minime uul-  
gari beneficio, sed maiorem (nisi mea me fallit opinio) pro tam  
illustri de uobis tanti Pont. Max. iudicio gratiam debere arbi-

Peroratio  
Pōtificio-  
rum acto-  
rum.

tramine. Collegi Patres, & in quasdam ueluti summas rede-  
gi, maiore mediusfidius cum breuitatis quam copie cura, Pontificia  
Pauli merita: dum & de eius in summum Deum cultu, deque per-  
petua in homines caritate, de pacificandæ Reip. flagrantissimo  
studio, eiusque rei causa indicto ac prope iam peracto concilio, de  
uestro sæpe repetitis cooptationibus ornato collegio pauca comme-  
morauim. Age uero nunc, si ad PAVLI uitam, mores, actiones,  
formam denique et oris figuram respicias, qui summum orbis ter-  
ræ principatum teneret, dignissimum fuisse, rebus omnibus que

Pauli Re-  
gia acta.

huc pertinent exponendis, æque ueritatis ac breuitatis habita ra-  
tione ostendamus. Reges Deorum esse certissimam prolem, inter  
gentes clari sapientia uiri literis prodiderunt: quod scilicet quo cæ-  
teris præcellant hominibus, eò uno gradu Diis ipsis inferiores esse  
uideantur. Sed illud longe uerissimum, quod diuinarum uocum  
interpretes & ipsius Dei & hominis IESV CHRISTI san-  
ctissimi legati bonis omnibus facile probarunt: A Deo potesta-  
tem

tem Principes accipere: neq; minus qui improbi sint, quam qui boni. Tantum uero interesse, quod illi ad hominum salutem, hi ad perniciem traditis à Deo opibus utantur. His DEVS tanquam pastoribus ac uerius sue uicariis potestatis parentibus populos committat: Illis tanquam latronibus, aut potius carnificibus corruptas atque impias ciuitates a! pœnam & cruciatus tradat. Discernuntur uero facile utrorumq; ingenia, ex diuersa imperii administratione. Illi temere, furenter, crudeliter, inique, libidinosè agunt & gerunt omnia: Hi certa ratione ac consulto, mansuete, clementer, continenter ac moderate. Illos qui in eorum sunt imperio populi, natos aliquando fuisse indignissime ferunt: Hi si humane iura naturæ pateretur, ne unquam morerentur cuperent. Optimorū PAVLVM non modo principum simillimum, sed eius totius, quam maxime diuinus princeps præ se ferre possit, diuinitatis compotè fuisse planissime perspicimus, si cogitata diuinitus, suscepta diuinitus, ab eo denique omnia à principatus initiis ad extremum humane uitæ halitum, diuinitus perfectà ostenderimus. Diuine sunt illæ, quinimmo summi Dei maxime propriæ facultates duæ, per quas sempiternus ipse Deus se ipso maxime fruitur, & mundus uniuersus, singulæque mundi partes Dei mente fruuntur. Cognoscendi atque intelligendi est altera: Prouidendi altera, ac benigne faciendi. Ab illa inest in Deo omnis omnium rerum scientia: Ab hac extitit aliquando à Deo omnium quibus fruimur Dei munerum, tam proluxa: tamque copiosa largitas: Atq; ab hoc fonte omnis in hominum genus, tum res omnes inuestigandi & contemplandi, tum bene & præclare gerendi facultas

Virtutes  
Regiæ.

Superior

cultas deriuauit. Harum in PAVLO utra se non ostendit? non extulit? non supra humane nature lumen effulsit? In quo uero unquam Principe salutaris illa ciuitatibus potestatis ac sapientie coniunctio certior fuit, aut euidentior? Quod si beatas fore Resp. censuit grauissimus ille intelligendi ac dicendi Auctor & Magister, quarum uel sapientes gubernacula tenerent, uel in quibus ii, qui summe rerum præessent, se sapientie studiis dedidissent: Cui unquam principi felicitatem suam hæc Rom. resp. quæ ecclesie nomine celebratur, acceptam referat, si non fuit PAV-

Doctrina.

LO imperante felicissima? Is enim Patres (atque id uestris omnium tacitis fretus iudiciis ac testimoniis fidenter atque intrepide dicam) tam fuit in omni uel diuinarum, uel humanarum rerum cognitione solers, tamq. earum omnium, quas in summo atq. optimo principe esse æquum est, literarum compos, ut si in aliquo fortasse uno uel facultatum, uel studiorum genere unum aliquem superiorum ætatum non superarit, neminem plane in uniuerso scientiarum & doctrinarum omnium concentu illo & ueluti choro, quam Græci Philosophiam, humanitatem nostri appellarunt, qui cum eo comparetur, ut omnia memoria repetas totius antiquitatis exempla, facile reperiatis. Et quoniam insita in animo rerum notiones, quales eæ sint, tum demum perspiciuntur, cum eas

Eloquētia

mentis quasi quosdam partus, oratio ad hominum aures pertulerit. Ea fuit Paulus in dicendo copia, grauitate, uertate: Is uel sermones uel perpetuas orationes exornabat insignibus: Eo etiam cum opus foret, lepore atque urbanitate condebat: ut neq. rerum maximarum cognitio orationis, neque ulla omnino, qua uel edo-

ceri,

ceri, uel affici, uel recreari auditores oporteret, eloquentiæ pars, eius intelligentiæ atq; admirabili ingenii capacitati ulla ex parte deesse uideretur. Commentitium ne id haberetur uereri possem, Patres, nisi è uestris tum sæpe singulorum, tum plurium sermonibus cognouissem, nunquam Pauli orationem in Curia è superiori loco de rebus maximis referentis, non amplam ac magnificam, non elegantem & politam, non omni ex parte undiq; admirabilem uideri solitam. Sermonibus certe, qui uel eo in cubiculo, sedente inter paucos, uel dum accumberet, circumstante fere semper doctissimorum hominum corona haberentur, tam frequens inter fui, quam alius quouis loci ordinisq; mei. Animaduvertebam quæstionem nullam in dictionem cadere posse, siue de uita et moribus, de civili scilicet ac populari quauis ratione, siue de naturæ obscuritate, siue de sacris diuinisq; rebus, atq; omnino retrusis atq; abditis in mediis à communi uitæ consuetudine remotissimarum disciplinarum latebris differeretur, quin de iis PAULVS et non omniū sentiret scientissime, et non promptissime simul & grauiissime loqueretur. Lam uero si de exquisiti cuiuspiã artificii, ut pingendi, fingendi, exædificandi quouis genere ageretur, non illi ipse profecto, qui in iis essent artibus callidissimi atq; experientissimi, de iis operibus, quorū se absolutione aut soli, aut cum paucis præstare posse profiteretur, uel acutius iudicabāt, uel probabilius, quid addi deniq; aut immutari oporteret, ostendebāt. Quo circa ab eo discedebat nemo, qui cū immensum prope rerū usum uitæ diuturnitati ac dignitati, multiplicè et exquisitam eruditione exactæ in optimis studiis ætati tribuisset, incomparabilem certe dicendi copiam, uarietatem, iucun-

ditatem atque in primis in affecta iam senectute memorie firmitatem summam non admiraretur. Nemo qui hæc à natura data, aut ulla humana industria comparata, & non à Deo ipso, de manu (quod aliunde) tractata iudicaret. Ipse equidem ex eius conspectu & sermonibus incredibilem quandam tum oculis, tum auribus uoluptatem capiebam. Nam si latine loqueretur, apte quidem ad nostri temporis consuetudinem atque accommodate dici omnia intelligebam. Sed ita, ut neque purius, neque elegantius ueteres illos latine lingue auctores, qui sæculis eruditissimis floruerunt, locuturos fuisse putarem. Tam si Græcorum uel sententias, uel uersus, quod in promptu illi erat maxime, pronunciaret, priscum orationis Græcæ sonum, & plane atticam uocum appellationem, mihi uidebar agnoscere. Illum itaque cum audiebam, ueniebat protinus in mentem, non cum iis tantum principibus uiris, qui patrium memoria literarum atque eruditionis laude in Italia præstiterunt, comparari eum posse, Alfonso Neapolitanorum Rege, Laurentio Medice, Guidone Feltrio, Pico Mirandulano. Sed tales tacita mecum cogitatione fuisse statuebam, uel Periclem illum Anaxagoræ auditorem, qui sapientia atque eloquentia Atheniensium ciuitatem annos plurimos rexit. Tam claros olim omni sapientiæ gloria apud Lacedæmonios Xenophontis Agesilaum, Apud Thebanos Lysidis Tarentini præceptis Epaminundam extitisse. Quatuor ego Romanos principes & imperio, & literarum exacta quadam cognitione eminuisse in ueterum libris comperio: Cæsarem dictatorem, C. Cæsarem Octavianum, Aelium Hadrianum, M. Antonium cognomento philosophum.

His



His ego omnibus tam fuisse literis parem, quam, quod dubitari non potest, morum probitate ac sapientia antesse Paulum censeo. Atque omnino, quod Tatito Imp. aliquando curiam totam acclamasse legimus, ad Pauli tempora multo iustius referuari debuisse. Quis melius, quam literatus imperat? Et sane in eius faciem intuens, non ingenii tantum, & præclare atque omnino diuinitus constitutæ mentis certissimum lumen, sed maiestatis etiam atque imperii perspicuis quibusdam expressis signis, oculorum, uultus, manuum, membrorum omnium, totius denique stature modulo conformatam, ad summam ac præcipuam dignitatem speciem, cum tacita quadam & iucundissima admiratione aspicebam, atque ociose, ita ut expleri tamen non possem, singula contemplabar. Sed quoniam, ut in corporis figura se animi habitus ostendit, multoque magis eum oratio præferat & enunciet, locupletiora tamen sunt & clariora intimorum sensuum, & suarum cuiusque uoluntatum testimonia, quæ quis egerit ac fecerit: Acta iam ipsa factaque Pauli urbi nota & spectata, & ad extremos iam orbis terrarum recessus illustri fama perlata, qualis, quantusque princeps, quamque dignus fuerit, qui non Pontificum modo, sed Regum etiam omnium uirtute ac sapientia maximus haberetur, omni posteritati, si mihi id optare, ius fasque est, per hanc laudationem meam fidem faciant. Hic ego non eas, quæ uel requiri, uel laudari solitæ sunt in priuatis etiam hominibus uirtutes persequor, pudorem, continentiam, frugalitatem, modestiam, lenitatem. Hæc & horum finalia humani animi ornamenta, dum certis honorum ordinibus continerentur, quantopere Farnefius coluerit, suis



ingibz

non est prorsus locis præternissum. Neq; statim ut supra omnem ordinem esse cæpit, earum sibi laudum decus aut non retinendū, aut non potius nihil minus, quam supremæ dignitatis fastigium poposcisset, amplificandum censuit. Silentio itaq; humiliores quædam (ut ita dixerim) eius laudes inuoluantur, nihil de innocentia dicam, nihil de humanitate, nihil de comitate, nihil de mansuetudine et suauitate, quibus certe laudibus cum æqualibus, tum suis in quouis ordine collegis ita antecelluit, ut sine inuidia mirificā sibi omnium beneuolentiam conciliaret. Sui sane corporis, et salubrium atq; insalubrium notitia, motus & quietis tempestiuitate obeunda, quibus rebus in tam longum sibi spacium uitam prorogauit, medicorum omnium peritiam superabat. Sed multo ille quidem magis abstinencia, sobrietate. Sed harum ego pulcherrimarum quasi animi dotium, facile patior nullam pene uideri à me rationem habitam, modo ut quæ in generosissimo principe præcipua quadam cum admiratione spectantur, iustitiæ, fidei, magnificentiæ, liberalitatis, clementiæ, placabilitatis, facilitatis, constantiæ, auctoritatis opera, non indiligentissime uisus fuero collegisse. Atque in summa ostendero, omnium eum ciuilis prudentiæ partium, quas animo & memoria comprehensus haberet, magna nobis & perillustria documenta reliquisse. Nam cum ille in omni uitæ, munerumq; suorum parte nunquam ab officio discessisset, nisi eos omnes qui familie suæ nomine continerentur, sui quamfirmilimos perpetuo præstitisset, iure de sua existimatione multum detrahi posse putabat. Fuit igitur illud plane nouum, atq; omnino in omnibus regnis ac principatibus inusitatum, quod in tanto familiari domesticorum

Familia-  
riū, ne-  
cessario-  
rū, nepo-  
tū probi-  
tas, absti-  
nencia.

mesticorum numero, ne unus quidem repertus fuerit, qui per. xv.  
 ipsos huius pontificatus annos iniuria quenquam lacefferit, con-  
 tumeliosus in quenquam fuerit, dicto, facitque alterum ledendi, aut  
 licentiam se habere arbitraretur: aut improbe si fecisset, impuni-  
 tate speraret. Ea erat totius domus disciplina, ut de principis gra-  
 tia quivis recte vivendi ratione & officiorum diligentia certaret.  
 Cum accumbenti, sedentium ministri sui assisterent, eorum illum  
 quendam, non coronam diceret: Intentos ad eius nutus & dire-  
 ctos omnes oculos habebant: Quae dicerentur summo cum silen-  
 tio auscultabant: Nemo, nisi cum maxime opus erat, ac nisi quam  
 parcissime loquebatur. Metuebant eum infirmi: verebantur hone-  
 stiores: carum omnes habebant. Atque eo erat in his & sui officii  
 observantia, & à cupiditatibus uacatio admirabilior: quod eos  
 PAULVS non tristis severitate, non imperandi acerbitate, sed affabi-  
 litate alios, alios beneficiis, hos tempestivis laudationibus, illos mi-  
 titibus monitis & lenissimis obiurgationibus, aspectus ipsius tueren-  
 da quadam maiestate, & ea maxime quam de eius divinitate ha-  
 bebant, opinionis vi et auctoritate omnes in officio continerebat. Sed  
 quid ego eorum qui honoratioribus apud eum muneribus funge-  
 bantur, continentiam et verecundiam admirem? Multi sane ex illis,  
 (quod in Regum domibus usu evenit) et claro loco et non vulgari-  
 bus fuisse honoribus praediti: in ordinem tamen eos cotidiani offi-  
 cii ratio adducebat: Ne quid quod graviore dignum esset reprae-  
 sentatione, committerent, tacita quaedam inter ipsos et de principis gra-  
 tia maxime sollicita emulatio, tum aliquis etiam animadversio-  
 nis metus deterrebat. Sed quid ipsius nepotes Farnesii quatuor?

Sfortia

Sfortiæ iam puberes tres? Quam illi non peruulgato prædiuitum ac beatorum iuuenum more, & libidines suas donatitas habuerunt, atque omnes cupiditates cohercuerunt? Recordamini, Patres (uidistis enim uestrum aliquot, audire omnes potuistis) quam fuerit aliorum Pontificiorum nepotum effrenata audacia, quam intoleranda fuerit sociis atq; huius imperii ciuitatibus, eorum petulantia, superbia, crudelitas. Cum illis Pauli nepotum uitam & mores conferre statuetis profecto his humanius ac moderatius nihil: Illis nihil ferocius, nihil scuius, nihil impotentius. Quid enim hi florentes ætatibus, circumfluentes opibus, affectatoribus & clientibus stipati aut per uim unquam fecerunt? aut quid cui unquam inuito ademereunt? in quamue domum probum aut infamiam intulerunt? Quid summo aut infimo cuiquam debuerunt, quod aut sponte non dissoluerint, aut à se exigere non æquissimo animo tulerint? Quanquam quid ego uiros, & eos uiros nihil unquam egisse turpiter dicam, nullo se unquam scelere obligasse, quorum non modo tanta sit, quanta in nullis unquam fuit iuuentutis principibus, eximie indolis expectatio, sed tam præclara cotidie magnarum uirtutum se decora in publicam hominum lucem profertant, ut quiuis facile eos possit Pauli nepotes atque alumnos agnoscere? Cum hanc etiam, quæ ex pulcherrima & rectissima nepotum institutione in Pauli nomen redundat, gloriam mirifice augeat *Victoria Farnesia* Guidonis Baldi Urbinati Ducis uxor, *Farnesia*: quæ cum iis omnibus laudibus semper excelluerit, quas in principe & *Augusta* femina inesse oporteat, ut nuper Romanis uirginibus, pudoris, modestiæ, probitatis lumen prætulit, ita nunc summi

Victoria  
Farnesia:

summi loci matronis omnibus fidei, officii, pietatis, humanitatis,  
 mansuetudinis, atque in primis sanctissimi in coniugem suum, è  
 quo iam mater est, amoris, maiora in dies atque illustriora per-  
 git exempla edere. Ac tales quidem Paulus domesticas appari-  
 tiones ac necessitudines præstitit. Quid uero? amicitias humane  
 uitæ firmissimum præsidium quemadmodum coluerit, ex eo ma-  
 xime perspicuum est, quod cum & longa ætas, & magna tempo-  
 rum uarietas, & singulare ipsius de bonis benemerendi studium,  
 infinitum prope ei amicorum numerum comparasset, neminem  
 omnino beneuolentia sua dignum duxit, in quo aut amoris per-  
 petuitatem & constantiam, aut in suscipiendis cum opus foret,  
 ipsius causa laboribus, aut periculis aduandis animi alacritatem  
 desiderarit. Violatæ certe fidei unus tantum ei pœnas maiesta-  
 tis damnatus dedit. Atque is quidem non modo secum seuerè agi  
 questus non est, sed facinoris quam commouisset, æstimationem  
 ex Pauli clementia sibi alleuatam ultro confessus. Permanserunt  
 reliqui in officio: & fidelitatis profecto sue, nemo non fructum  
 tulit. Nam statim ut ad Pontificatum Max. peruenit, & ui-  
 uentibus ac præsentibus gratiam retulit, et absentes pro sui quen-  
 que loci atque ordinis ratione, ad certos honores & munera, non-  
 nullos etiam ad uestram istam, Patres, purpuram, tum ex Italia  
 urbibus, tum ex Prouinciis euocauit: Tantaque est eius caritate  
 ac beneficentia complexus, ut ambigi non posset, si præclara illa  
 scientiarum lumina, Ficini, Læti, Mirandulæ, Politiani, quos ado-  
 lescens coluerat, ad hæc tempora peruenire potuissent, cupide om-  
 nes & liberaliter ornaturum fuisse. Sed cum mors illi hæc facul-  
 tatem

Qualis in  
amicos.

tatem

De popu-  
lorum in  
ipsius Pō-  
tificatu  
felicitate.

tatem iam pridem præripuisset, tam frequenter eos in orē habebat, ita sua exornabat cōmemoratione, ut facile intelligi posset, non minus pie ab eo mortuos desiderari, quam fuissent uiuentes, magnifice honestati. Age uero, qui se talem domesticis familiaribus, talem amicis præbuerit, qualis in populos ac ciuitates fuerit, quæ in ipsius ditioe fuerunt, uideamus. Primum ille ut se imperante quam beatissima essent, præcipue & antiquissima curæ sibi esse debere cum intelligeret, legatos in eas suos & præfectos dimisit, uiros graues & ornatos, & spectata cum uitæ integritate, cum nominis auctoritate. Per eos & bonis legibus, quas antiqua rī suisset superiorum præsidum (ut leuissime dicam) incuria, restitutis & nouis perlatis, passimque per oppida omnia ac municipia seuerissimis propositis edictis, breui omnem facinorum improbis licentiam ademittit: Impunitatē cohibuit. Vm omnem compressit: Factiosos à turbulentis cogitationibus pænæ metu deterruit: Optimum quenque ad quietis, ocii ac tranquillitatis minime dubiam spem erexit & excitauit. Ciuium in primis concordie, iurisdictionis æquabilitate ut consuleretur, operam dedit. Nullo itaq; tempore, aut æquiore conditione cum aduersario experiri licitum est in priuatis iudiciis, aut ex iuris, æqui boni præscripto, lites & controuersie diligentius cognita. Nunquam potentiores gratia, aut pecunia ad tenuiores opprimendos minus ualuerunt. Ac certe sublati corruptelis & largitionibus, nunquam minus differendis uadimoniiis, aut comperendinationibus iterandis, uel à patronis, uel à iudicibus obscuriores persone aut expilata, aut lacerata. Quid nunquam minus dico? cum certis quæstoribus

in ma-

in magistratus anquirendi, et populus prouocandi potestate data,  
 nunquam in eos grauius fuerit animaduersum, qui aut iniquis iu-  
 dicioꝝ disceptationibus, aut ullo uel calumniarum, uel cauilla-  
 tionum, uel quouis iniuriosarum actionum genere, cuiusquam bo-  
 nis & fame periculum creare conati fuissent. Iam uero in crimini-  
 bus plectendis adhibita quidem est seueritas, ne remissior scilicet  
 lenitas in licentie deduceretur exemplum. Sed ita capitalioribus  
 est fraudibus pœna irrogata, ut suus tamen in iis cum tolerabili-  
 res essent, noxæ clementiæ, suus fuerit semper misericordie locus.  
 Agno hæc à uobis, Patres optimi atque amplissimi, et ab omni  
 hac ornatissimorum uirorum corona cum assensu audiri ex eo in-  
 telligo, quod tantum silentium ut ab initio Pauli laudationi da-  
 tum in nihil dubitare potuerim, orationi certe meæ, præsertim uē-  
 ro si longius ea proueretur, tam perpetuam attentionem opta-  
 re magis quam sperare debui. Sed si quis fortasse, quæ à me de ci-  
 uitatum iudiciis dicta sunt, commentitia & quasi de commenta-  
 riis qui de iudicum officiis conscripti sunt, sumpta arbutatur, Is  
 qui status fuerit singularum ciuitatum sub Pauli imperio, ratio-  
 ne & animo complectatur. Intelliget profecto, intelliget, non  
 fuisse ciuitates tantæ concordie, tanti animorum consensus, tantæ  
 seueritatis, tantæ denique omnium ordinum hilaritatis ac letitiæ  
 compotes futuras, nisi optimarum legum sanctitate, earum fuis-  
 set felicitati prospectum, nisi iuris æquabilitate, iudicioꝝ ac iu-  
 risdictionis tum seueritate, tum moderatione perfectum esset, ut  
 sua quouis facile ac sine molestia tueretur, ab alienis mentem,  
 oculos, manus abstinere. Quod si ægra plerumq; & grauius affe-



Et ac iam prope desperata corpora, cum medicorum solertia, tum eorum, qui illis assederint, diligentia, fide, assiduitate recreata, et ad bonam ualeitudinem restituta confitemur: Cur quisquam populorum salutem, et incolumitatem à PAVLI consilio et prouidentia, atque eorum qui pro PAVLO urbibus præfuerunt, integritate, & fideliter ac scienter munerum suorum obita procuratione profectam non existimot? Verù enim in PAVLI pontificatu non salus tantum & incolumitas ciuitatibus obtigit: sed neque unquam opibus firmiores, copiis locupletiores, uirtute & optimarum artium studiis honestiores fuerunt. Externa bella procul ab Italia quasi uisceribus amota, ciuilibus contentionibus, rixis & iurgiis, unde omnis existere consuevit seditionum atrocitas, publici priuatique iuris nutu & auctoritate freni fuerant iniecti. Placato supplicationibus, & diuinarum rerum accuratissima administratione, atq. in primis emendanda uitæ ratione, summo Deo, nulli unquam ætati hominum maior salubritas contigerat. Vno tantum incommodo (ut nulla est humanarum rerum satis plena & absoluta felicitas) unico inquam incommodo, ac uerius calamitate, infimæ & egentis multitudinis fortunæ affligi poterat: nisi eius quoque calamitatis metum parentis optimi ac sanctissimi uigilantia remouisset. Agrorum communis toti fere Italie, & pertinacæ quedam in multos annos sterilitas non mediocre famis periculum importarat. Dimissis in longinquas prouincias frumentariis, ita ei periculo PAVLVS occurrit, ut magno frumenti numero comportato, nulla suæ ditionis ciuitas alimenta desiderarit, & annonæ charitatem non maxime tolerabilem senferit. Facile



vero omnis opificum turba, & ii omnes, quibus esset è cotidiano  
 quæstu uictus queritandus, esse frumenti precium paulo impen-  
 sius patiebantur: dum earum calamitatum, quas proximis supe-  
 rioribus fere omnibus annis perpeſsi fuerant, metu carerent: ne ſci-  
 licet aut militum itineribus, et sæpe hoſtium populationibus agri,  
 aut magnorum exercituum hybernis urbes eſſent infeſtæ. Ac ne  
 dum inter ciues ob ſeditionum tumultus gladii diſtringerentur,  
 ipſi clauſis tabernis atque officiis, ſuam coniugumque ſuarum,  
 & paruulorum liberum famem ſceneratò corraſis numulis ſola-  
 rentur. Quantos uero fructus, quanta commoda, libera commer-  
 cia, tuta itinera, *Aemiliæ, Flaminie, Aureliæ, Caſſiæ, Vale-  
 riæ, Appiæ* oppidis, uicis denique omnibus ac diuerticulis attule-  
 runt, non latrocinii ſolum, ſed latronum etiam nomine, per eo-  
 rum, quos *Paulus* ciuitatibus præſecerat, curam ac diligentiam  
 oppreſſo, ſublato, penitus extincto? Neque enim ullo ante un-  
 quam tempore, maiore uel mercatorum, uel uiatorum frequentia  
 cum urbs ipſa, tum *Italiæ* fuerunt, qua urbs admi ſolet, partes ce-  
 lebratæ: Cum magnos etiam hominum in urbem concurſus, uel  
 unius tanti principis, tamq: *Auguſti* ac tam uenerande maięſta-  
 tis uiſendi ſtudium pertraheret. In magna igitur rerum omniũ co-  
 pia ac perpetua populorum celebritate, et à ſuperiorũ temporum  
 calamitatibus reſpirauimus, et inſolita quadam letitia exultau-  
 mus. Feſti dies cum ſolēnibus pompis agitari, nuptiæ inter ordines  
 creberrimæ cōiungi, ſoboles agnaſcere, iuuentus propagari, excoli  
 liberaliũ ſtudiorum diſciplinæ nunquam deſitæ. Extulit ſe et pro-  
 pe ad ſuum profecit apicē eloquentiæ, quam togatorũ eloquentiſſi

Literæ et  
 bonæ ar-  
 tes om-  
 nes illu-  
 ſtratæ.

De Regiis  
Pauli quo  
ad rē Bel-  
licam uir-  
tutibus

mus ille et ingenio ac literis abundantissimus, pacis comitem, ocii-  
que sociam et bene constitutarum ciuitatum alumnā dixit. Iam  
uero artes quædam ingenuis finitimæ, psallendi, canendi, singen-  
di, pingendi, ædificandi, eò prouectæ sunt dignitatis, tamque ma-  
gnos ac nobiles auctores nactæ sunt, ut qui meliores eas reddi, aut  
magis expoliri atque illustrari posse putet, is naturam & artem,  
quod sapientes fieri negant, ad infinitatem progredi posse spera-  
re ausit. Rei militaris scientia, remota hostilium diuinationum  
necessitate, in umbratili quadam & ludicra exercitatione reten-  
ta: Ne cum extra Italiam, contra alienas à nomine rituq: nostro  
gentes delectus haberi, & legiones educi opus foret, rudes plane  
ad bellicam uirtutem, & non optime instituti & comparati no-  
stri essent Tyrones. Ludi itaque cum sæpe intra urbium mœnia,  
ad equestris pedestrisque pugnæ imaginem fierent, & iis populi  
spectaculis oblectabantur, & iuuenum corpora ad Castrenses  
labores, atq: ad omnis fortitudinis munia exercebantur. Atque  
hic fuit earum quæ Romanæ Reip. parent, ciuitatum status. Hæc  
temporum tranquillitatem, hanc uitæ elegantiam & honestatē,  
PAULI prudentiæ, atq: æquitati debere se, omnia latinorum, Sa-  
binorum, Piceni, Flaminiæ & Aemiliæ oppida publicis elogio-  
rum, statuarum & imaginum monumentis testatum ut omni esset  
posteritati, grate pieque curarunt. In his enim maxime locis, aut  
nihil omnino unquam turbatū, aut si quid per paucorum factio-  
sos conatus tentatum est, omnis est motus celerius quam uel sen-  
tiri potuerit, compressus. Hæc certe tempora summus ille summi  
Dei interpres uaticinatus illis carminibus uideri potest. Eri-  
opus

opus iustitiæ pax: Cultus iustitiæ silentium: In omne posterum  
 ævum securitas: conquiescet populus meus in pulchritudine pa-  
 cis: In tabernaculis fiduciæ, & in requie opulenta. Quorum uti-  
 nam temporum, Patres, liceat nobis per divinam elementiam cur-  
 sum retinere: Liceat nobis almam & augustam pacem, Liceat  
 præsentem hanc et auream (ut ita dicam) libertatem, Liceat que  
 nobis divini seminis, cuius nunc in conspectu nostro ex animum cor-  
 pus iacet, consilium & sapientia peperit atque effecit, oia retine-  
 re. Atque ut retineamus, in uestre Patres, positum magna ex  
 parte est incorruptæ mentis, atque incorrupti iudicii, quam ad-  
 ferendum de PAVLI successore suffragium adhibueritis, integra-  
 te. In eius perpetua & constantissima positum est, quem vos in  
 PAVLI solio collocaveritis, PAVLI virtutū imitatione. Sed insti-  
 tutam nos oratione persequamur, et de reliquis magni huius prin-  
 cipis laudibus, carptim pauca & primum ueluti labii deguste-  
 mus. Hic ego Patres, non defuturus intelligo, qui laudationi huic  
 meæ, quatenus Pont. Max. convenire uideatur, assentiantur. Et  
 pietate ac religione, iis quos ante nominavi Pontificibus, Max.  
 & aliis quibuscunque, per quorum solertiam, doctrinam, sancti-  
 moniam Christi Resp. aucta & propagata est, non inferiorem  
 fuisse concedant. In imperii etiam omni iurē ac dignitate tuenda  
 & defendenda, omnibus denique meritis in socias civitates ac po-  
 pulos, iis quos omnis posteritas non ut Pontifices tantum Max.  
 sed ut principes etiam optimos ac prudentissimos, summaq; ani-  
 mi magnitudine multo præstatißimos, magna ei perpetua digna-  
 bitur nominis prædicatione, Martino & Nicolao Quintis: Pio  
 & Iulio

& Iulio secundis, Leone. x. Clemente. vii. iis inquam PAVLVM  
 Tertium maiore multo digniorem gloria confiteantur: Nempe  
 quod illis Romanæ Reip. gubernacula & scepra tenentibus, ea  
 quam PAVLI ingenio, industrie, sapientiæ fuisse tribuendam osten-  
 dimus, non urbi Romæ, non sociis urbibus tranquillitas tempo-  
 rum & securitas contigerit. Nam & bellis externis arsit Italia,  
 & perniciosissimis ciuitates seditionibus laborarunt: Vniuersa  
 Respub. & ipsa in primis urbs modo secessionibus est conflicta-  
 ta, modo funestis insolentissimarum factionum digladiationibus  
 eruentata. Mitto fugas, exilia, cædes: Mitto prænunciatam to-  
 ties ostentis, prodigiis, seuisissimisque Tyberis eluionibus Deum  
 iram, quam toties intolerandæ famis, & fœdissimæ pestilentie lue-  
 runt populi atrocitate. Prætereo, ne ingentis doloris & luctuosissi-  
 mæ cladis memoriam refricem, inportunissimam ac seuisissimam  
 urbis direptionem, profanorum, sacrorumque capitum uolatio-  
 nem, sacrosancti collegii & ipsius Pont. Max. impiam illam &  
 auditu ipso exhorrescendam oppressionem. Ab his tot tantisq:  
 malis uacuitas, qua quintum iam & decimum ipsum annum per  
 frui potuimus, in excelsiore multo, quam superiores qui sunt à me  
 paulo ante nominati Pontifices, PAVLVM gloriæ collocat gradus:  
 In maiore enim multo est laude ponendum, ne bella gerenda ef-  
 fessent prouidisse, quam uel fortissime bellorum impetus sustinuisse.  
 Est enim hoc plerunque uel necessaria fortitudinis, uel nimie ad  
 subeundam fortune aleam procliuittatis. Neque profecto non  
 multo melior est gubernator ille putandus, qui procella impen-  
 dente in portum se receperit, quam qui cum se aduersissimæ tem-  
 pestati

pestati commiserit, de sua & uektorum salute in dubium uenerit. Quocirca nemo satis intelligens fuerit satisque rerum æquus æstimator, qui in urbana quoque ac ciuili Reipub. moderandæ ac tuendæ ratione, non ante cæteros quosunque Pontifices PAVLVM ponat. Arguet tamen fortasse me, quod in PAVLO exornando cupidius prouehar, ac mihi fere nimis indulgeam: qui quasi nesciam regias atque imperatorias uirtutes non urbium manibus, aut togæ muneribus contineri, sed in armis multo magis elucere, se in regendis ac ducendis agminibus, signis conferendis, urbibus oppugnandis ostentare, PAVLVM tamen parem facere summis coner principibus, quorum maxime illustres fuere de ferocissimis hostibus uictoriæ, quique bellica uirtute imperium iisdem prope mundi regionibus terminarunt, quibus sol cursus definit suos, cum iam ante demonstraturum me professus fuerim, unum, qui summum orbis terræ principatum teneret, dignissimum fuisse. At enim non deerunt qui suum hoc esse decus dicant, suaque illorum ingenia, quorum trophæa ac triumpho publicis titulorum notis adhuc extant incisi, multoque (ut ita dicam) uiuacius grauißimorum scriptorum monimentis ad nominis immortalitatem propagantur: Duplicem hanc laudem Cæsariibus, Octauiano, Vespasiano, Tito, Traiano, Constantino, multisque aliis regibus atque imperatoribus relinquendam: Militarem certe gloriam ad Pauli uitam nulla posse ratione accommodari. Ego uero ut negare non possum, ei qui ad pacis fuerit studia multo propensissimus, atque esse debuerit, non fuisse ad belli ultimum munus descendendum: Sic affirmare non dubitem, si quod

cum

eum tempus, si qua communis ratio salutis, ad iusti priusque belli alicuius expeditionem inuitasset, non consilium, non uirtutem, non inuicti animi robur, non denique corporis quanta esse possit in tam grandi natu imperatore, ei tolerantiam fuisse defuturam. Non semper præclaros animi habitus aut expedit, aut usu euenit quasi in actum deduci. In quo inest artis & uirtutis alicuius habilitas quædam, etiam si nullum extet opus, eius tamen quæ pollet, facultatis satis egregiam laudem fuerit consecutus, cum quod præstare potuerit, id necesse non esse præstabilius duxerit. Pacatissima illa tempora & plane uti appellata fuerunt, aurea, Saturnum uel in Creta, uel in Italia regnante regis nomine & auctoritate non minus dignata sunt, quam Iouem eius filium, & successorem quæ consecuta est exorientibus iam bellis ætas. Sed prisca illa nimis & prope poetica. Sed ut ad historiæ me certissimam fidem referam, sub ipsas urbis Romæ origines, non fuit aut primi parentis & conditoris Romuli ferox et bellicosum ingenium, aut Fulci uehemens illa ad arma procluitas, quam Numæ Pompili qui medius inter hos regnauit, pacatum & conuersum ad religionem & sanctitatem, ut tunc ferebant tempora, constituendam, imperium, regio nomine dignior. Illorum consiliis fuit urbs amplior: huius tutior. Per illos formidolosior: per hunc fauorabilior, ac finitimis populis numinum maiestate, quam ullis uel hominum, uel manuum præsidii munitior. Illum ipsum, cuius paulo ante mentionem feci, Cæs. Octavianum, magis credo aut ciuilia, aut externa bella, quam Ianus clausus, pace terra marique parta, nobilitarunt. At perpetuæ pacis temporibus & Augusti cognomen S. C. meruit et pri-

mus



mus post Marcum Tullium Ciceronem est pater patrie saluta-  
tus. Bella gerentem ita oderant homines, ut nunquam natum mal-  
lent: ita pacem colentem dilexerunt, ut optare auderent ne un-  
quam moreretur. Eadem in Antoninis Pio, & Philosopho fuit  
ratio, eadem in Aelio Pertinace, eadem in Decio, quos omnes  
Patrie parentes cognomento à populo Romano appellatos, uete-  
rum nobis scripta tradiderunt. Et optimi illud cognominum om-  
nium amabiliſſimum & maxime fauorabile, non rerum foris ge-  
ſtarum magnitudo, ſed urbana in populum Romanum merita Traiano  
compararunt. Sed quid ego humanorum exemplorū nitar aucto-  
ritate, dum affirmo, magnorum Principum laudes uel in ſolis pa-  
cis operibus ſatis habere præſidii, ad imperii maiestatem tuendam  
atq; obtinendam? Summus ipſe unicus et ſempiternus DEVS, non  
magis proſecto rex regum eſt omnium, minis cum terret, aut ſup-  
plicio facinorofos atque impios plectit, quam nos, cum munerum  
ſuorum largitate reficit & recreat. Ille etiam ipſe DEI filius,  
DEVS, et homo, qui ſue nos uitæ, ſue mortis, ſui in uitam atq;  
in calum reditus admirandis myſteris, ſalui ut eſſemus effecit,  
& omnes ad beatiffimæ immortalitatis præmia à ſempiterna  
morte excitatos reuocauit. Ille ipſe IESVS CHRISTVS, &  
re & uerbo paternum, et idem cum patre regnum regnorum om-  
nium excelsiſſimū poſſidet. Quam uero ille ab armis homines ab-  
horrere iuſſit, qui et omnem ulciſcendi licentiam ſublata non uoluit,  
et eis quos ſue ſibi in terris poteſtatis ſucceſſores delegit, tanquam  
certiſſimam hereditatem, et bonorum omnium maximum, quæq;  
bona alia omnia continerentur, unicam pacem ad parrem in ca-  
lum



Vrbes mu-  
nitæ.

lum cum immortalī corpore ascensurus, quasi testamentum in  
procinctu faciens, unicam inquam pacem reliquit? Atenim  
cum de PAVLI tanquam de magni & omnibus numeris abso-  
luti cuiusdam regis atque imperatoris, laudibus sermo sit, indu-  
striam et solertiam ei bellicam non defuisse ostendamus. Primum  
ille quidem sue ditionis urbes omnes, quibus hostiles uel incursio-  
nes, uel oppugnationes metui possent, in Gallia Cispadana, Um-  
bria, Piceno, Latio, Sabinis, ipsam in primis urbem Romam,  
muris, arcibus, propugnaculis atque omni operum genere ita mu-  
niuit, ut neque tanta impensa tantaque celeritate, uel intra tam  
paucos annos una aliqua urbs, uel plures urbes omnibus annis  
muniri potuisse uiderentur. Tantam intra earum quas significa-  
uimus urbium mœnia, Aenearum baliistarum, Tantamque eo-  
rum quæ diu seruari possent, commeatum copiam congescit, ut  
sue obsidiones propulsandæ forent, siue sustinendæ, uel potius  
eludendæ, firmamenta nulla ualidiora ad populorum fidem &  
beneuolentiam accedere potuerint. Ea in singulis cum opus fuit  
præsidia, eosque præsidiorum præfectos collocauit, ut cum mili-  
tium fide ac uirtute, magis quam numero pollerent, & fideli ciui-  
tates custodia uterentur, & ærarii rationes immodicis non onera-  
rentur stipendiis. Atque ea quidem fuit in præsidariis omnibus  
principis uerecundia, ut non modo nihil quod ab illis improbe fa-  
ctum esset, nulli unquam oppidani questi fuerint. Sed quod tales,  
tamque abstinentes dedisset sibi fortunarum suarum custodes,  
PAULO sæpissime gratias publice ciuitates egerint. Tam uero  
cum pœni prædones maiore iam quam ante actuariarum et lem-  
borum

borum numero Italiae littora infesta redderent, ad Piraticam illam audaciam coercendam classes duas, ad Anconem unam, alteram ad Centumcellas habuit, ita instructas et ornatas, ut ad has superi, inferique maris oras aut omnino Piratae non accederent, aut si aliquando appulissent, incautius id se, quam insidiosius ausos, malo suo edocerentur. Ad hunc modum PAVLVVS, & imperii sui fines perpetuo tutatus est, et omnium quae in ipsius fuerunt imperio, ciuitatum saluti atque incolumitati consuluit. Et eum ego, qui in rebus cum imperatoris artibus coniunctis consilio optimo sit usus, qui omnia prouiderit experienter, cauerit solerter, confecerit celeriter, Eum inquam spiritus regios atque imperatorios habuisse non putem? Citius illi mihi qui admirandi operis aedificium metatus fuerit, non fuisse dicatur architectus, quam qui imperatoria uel in propulsandis tantum hostium iniuriis munia scientissime obierit, in imperatorum is numero non reponatur. Quid uero, cum semel atque iterum futuri belli rumores percrebuissem, qua cura, qua diligentia & delectus habuit, & ueteranorum cohortes sub optimis & praestantissimis Italiae ducibus, per ea loca quo periculum intentari posset, disposuit, et iustos exercitus usque dum omnis tumultus conquiesset, & minae iactari ac propom desitae fuissent, aluit? Atque illud quidem satis inter omnes constat, quibus PAVLI heroica illa, aut diuina potius animi magnitudo ac sublimitas, illaque, quam paulo ante at tigi in imperatorio omni munere fungendo habilitas, familiaris nota fuit, si quod nunquam contendere destitit, Reip. proceres exorare potuisset, ut communi consilio atque opibus, commune sa-

Delectus  
habiti ad  
vrbiū præ  
fidia.

crosanctæ crucis vexillum secuti, in Turcas bellum terra marique:  
 susciperent, et tam iusto sacroque bello, ipsum ipsummet & inter-  
 futurum, & præfuturum fuisse. Neque id vobis, Patres, de tam  
 generoso, tamque vera solideque gloriæ cupido principe dictu ab-  
 surdum uideri debet: Nam & animi immensam illam, & maxi-  
 me piam alacritatem inuisset atque incitasset, umcæ religionis quo  
 flagrabat amor, restituendæ Christianis populis, quæ nunc mise-  
 rabiliter immanissimis hostibus seruiunt, pristina libertatis spes,  
 extorquendæ de seui ac truculenti Tyranni manibus Græciæ,  
 cuius à puero linguam, literas, disciplinas adamarat, uehemens et  
 inquires cupiditas. Corpus, uti scitis, natura siccum, frequentique  
 motu, urbanis & agrestibus ambulauionibus, multis & singulis  
 itineribus exercitum habuit: labores unus libentissime ac de in-  
 dustria uoluntarios tulerat, ut perferre aliquando posset etiam ne-  
 cessarios. Quam patiens uero fuit æstus & frigoris, qui quoties  
 equo esset iter ingressus, uix uento, uix imbre, uix puluere adduci  
 posset, ut in lecticam descenderet? Quam uero ille senectuti nun-  
 quam indulsit? quamque nunquam illam sibi molestam sensit?  
 Qui suadentibus aliquando in longinquiore itinere, domesticis co-  
 mitibus ut se respiceret, urbane (ut sæpe solebat) quid me inquit fa-  
 cere oportuerit, cum senex fuero? Acute nempe, qui multa,  
 quæ senem (ut Poeta inquit) circumueniunt incommoda, nulla  
 ipse sentiret, eos qui ut senectuti suæ parceret, hortabantur, illussit.  
 Quam uero præclaros uel si classe, uel si pedibus contendisset, co-  
 mites, quam certa tuendæ ualitudinis præsidia habuisset, mirifi-  
 cam sobrietatem, & in cibo potuque, atque omni uictu temperan-  
 tiam,

tiam, quibus rebus facile perfecit, ut et pauciores quam quisquam  
 unquam princeps somno horas dederit ( cum antelucana sæpe  
 tempora uel in negociis, uel in uia sine ulla molestia consumere  
 potuerit ) & medicis uti, tanus omnium quam minime necesse ha-  
 buerit. Vires itaque corporis, hæc firmas perpetuo & æquas pro-  
 pe animi uiribus præstitissent : Auxisset uero ingens ob suscep-  
 tam atque exorsam tam piam, tamque exoptatam expeditionem  
 letitia. Verum cum illum nimis, heu nimis, propagata intestina-  
 rum discordiarum semina, pulcherrimi uoti compotem esse non  
 fuissent, alia quæ ad armati imperatoris acta quodam modo re-  
 ferri possint, rei præclare ac magnifice gerendæ tempora atq; oc-  
 casiones non prætermisit. Nam cum ipsummet non deceret, bello  
 rum causa quæ non indicerentur ab uniuerſa Repub. à sacrorum  
 procuratione, à Romanis aris, focis, puluinibus discedere, bellan-  
 tem certe cum Turcis Cæsarem instructissima classe, & aliquo-  
 ties terrestri exercitu pecuniaque plurima iuuit: Eidemq; ferocis- In Germa  
 simos Germaniæ populos impiis à religione institutisq; maiorum, niam mis-  
 seditionibus ab alienatos in ordinem cogenti, ab urbe in Noricos sa auxilia.  
 usq; et Vindelicos lectissimas ad mille et ducentorū equitum tur-  
 mas, peditū amplius duodecim millia præsidio misit. Quibus sa-  
 ne auxiliis, post ueteris illius Ro. Imp. immutationem, quando uel  
 maiora, uel meliora, uel ad speciem etiam ipsam pulchriora alpes  
 transcendissent, qui ea tunc spectarunt, neq; se uidisse, neq; audis-  
 se, neq; legisse meminerunt. Eò uero fuerunt admirabiliora, quod  
 illis cum Alexander hic Farnesius, PAULI legatus, ducum ue-  
 ro nomine, Octavius Farnesius et Sfortia Sanctiflorius impera-  
 rent,

rent, ita permansit in officio miles, ut quacunque illa agmina iter facerent, non detrimenta, sed quaestum, non molestiam, sed uoluptatem populis apportarent. Haberent uero praeculis, quibus res gestae P. R. ex literarum monumentis cognite essent, prae illius continentiae exempla: Neque magis fuisse uel Africani, uel Catonis Censorii, uel Aemilii Scauri, abstinentes exercitus putarent. Nos uero qui non prorsus ignorabamus, quae praecipisset, quae monuisset, quibus cum mandatis nepotes tris PAVLVS dimisisset, in trium adolescentium ductu auita consilia et auctoritatem intuebamur. Atque harum quidem copiarum aduentus uix dici possit, uel quantam hostibus trepidationem iniecerit, uel ad quantam successuum spem Caesarianos erexerit. Vidi ego, cum in castris, quae tunc ad Naustadium Vindelicorum castrum in ulteriore Danubii ripa fuerunt, legatum Caesar complexus, alacri uultu atque oratione, optatissimam sibi atque opportunissimam rebus suis, illam tam praecleari subsidii accessionem esse gratulatus. Et profecto quae in Germania illae cohortes, illi duces, illi ex urbano delectu milites, uirtutis suae monumenta reliquerint, nihil attinet hoc loco dicere. Neque enim iam nunc defuerunt, qui suis eas res commentariis expositas in uulgus ediderint. Satis liquido iam ex iis, quae de bellicis rebus a me sunt perstricta, constare arbitror, magni imperatoris PAVLO, neque animi comparationem quandam, neque postremo aliquam etiam declarandae bellicae fortitudinis facultatem defuisse. Sed orationi modum iam meae statuere conanti, cum se mihi plurimae etiamnum offerant regiae summi huius principis uirtutes, neque possint omnes breuiore,

breuiore, quam pro tantarum laudum numero, oratione concludi, ex iis tamen nonnullas, quæ in PAVLO maxime illustres fuere, maximeque eminuerunt, tacitus nullo modo præterire possum. Ac primum quidem tanta fuit humanitate, tantaque affabilitate, ut quos opinione iudicioque suo probasset, & ultro cum per amabili quadam oris hilaritate, & uerborum lenitate ad sermones conferendos inuitaret: Et ad eum nemo sane unquam bonus accesserit, quin eius oratione semper conciliatus, beneficio sæpe deuinctus abierit. Iam uero cum uel opulentissimi reges, tantas tamen opes non possideant, ut omnium postulatis liberalitate sua possint respondere: Neque tam late potest gratia patere, ut omnibus quæ rogant, omnia concedi ius fasque sit: PAVLVS nemini cum potuit & licuit, non benignissime fecit. Quod uero sibi proximum beneficentiæ locum uindicat, tam fuit omnibus aditu facilis, ut non modo salutatores atque interuentores ad intimos domus recessus admitteret, sed in publicum cotidie, cum per ualeitudinem liceret, prodiens, sui conspectus & aurium omnibus cuiusuis gradus & ordinis, summis æque atque infimis copiam faceret: Ac dum uel deambulare, uel gestaretur, uel equo, uel lectica portaretur, diceret apud eum summotæ turba quamdiu quisque uellet, & audiretur placidissime, atque ita dimitteretur, ut ne à priuato quidem homine, æqualique suo audientiam sibi benigniorem fieri potuisse prædicaret. Neque uero tantum ad mansuetudinem, gratiamque suam impertiendam mitis & lenis fuit; sed animaduertiendi etiam in eos, à quibus & lacesitus & lesus fuisset atrociter, moderatione omnibus cum ueteris, tum recentis memorie

Humanitas.

Facilitas.

memorie



Clemētia

memoriæ principibus ita antecelluit, ut hac ipsa præcipue regia, atque adeo diuina uirtute, quam bonitatem, placabilitatem, clementiam appellamus, quasi cælestibus alis supra omnem humanitatis laudem sublatus, in sempiternas illas cælitum sedes facile ac merito subuolasse credi possit. Nam grauissimis illum, & quibus nemo unquam maioribus, & à quibus minime debuit, provocatum iniuriis omnes meminimus, & ulciscendi quidem id si op-

Animi moderatio.

tasset, potestatem scimus ei defuturam non fuisse. Nulla tamen in eo unquam iracundiæ, uel odii uestigia animaduertimus. Possem ego, Patres, quibus, quas fraudes, quæ coniuncta cum publico scelere, in ipsum, familiamque ipsius totam, excogitata & patrata facinora ignouisset, commemorare, nisi ipsum quam leniter & misericorditer dum inter nos uiueret, maximas & foedissimas iniurias obliuisci uoluisset, tam pure nunc & sancte, immortalis iam uita fruente, illarum etiam rerum, illorumque hominum parci nominibus uelle putarem. Auocant præterea ad se orationem meam uirtutes due, tam magnæ tamque præclaræ, ut per eas maxime humana cum diuina natura coniungi & copulari uideatur. In earum altera decoris inest, ordinis atque omnis concinnitatis perpetuitas: In altera magni elatque animi splendor, & cotidianos hominum conatus exuperans magnorum operum molitio ac designatio: Priorem constantiam, hanc magnificentiam appellamus: Atque ut cæterarum omnium uirtutum, sic harum maxime è diuina mente existunt perspicua & illustria exemplaria. Quid enim aliud, eam quam admirari nunquam desinimus, huius tam elegantis tamque operosæ molis quem mundum dicimus, pulchritudinem



chritudinem effecit & expoliuit, quam superiorum inferiorumque  
 rerum uarietatis, ac uicissitudinis in eundem semper ordinem, ac  
 naturæ consensum continuata ratio? Atque ob hoc quidem pri-  
 mum fonte Constantia ipsa in hominum actiones influxit &  
 deriuauit. Iam uero illa cælestium orbium, atque ignium immen-  
 sa prope magnitudo, illa è rudi atque informi materia corporum  
 omnium architectatio, et ad uniuersitatis formam partium inter  
 ipsas coagmentatio, ad diuinorum operum primum admiratio-  
 nem, deinde ad quendam imitationis conatum, quantum inter has  
 humanarum rerum umbras licitum esset, hominum mentes erexit  
 & excitauit. Suos itaque hinc ortus nata est, quæ magnis maxi-  
 me principibus propria semper uirtus fuit, Magnificencia. Ha-  
 rum utraq; quosnam sibi ad superos gradus PAVLVS extru-  
 xerit uideamus. Ac primum, quid ego, quod uulgo notum est o-  
 mnibus, in uitæ, uictusque parte qualibet, atque omni ocii ac ne-  
 gocii dispensatione nihil eo dicam ordinatius, elegantius, decen-  
 tius fuisse? Nihil in dictis factisque omnibus grauius? In senatu  
 statis diebus habendo, supplicibus libellis subscribendis, in lega-  
 tionibus audiendis, priuatorum causis cognoscendis, diuinisque in  
 primis rebus procurandis atque celebrandis, fuisse quem sibi se-  
 mel præscripsisset, modum æquabiliter semper ac perpetuo, suoque  
 maxime tempore ab eo conseruatum? Cum unicum eius factum  
 facile quam admirabili constantia fuerit, planum et perspicuum  
 faciat: Et quod nam illud fuit? Cum semper inter dissidentes re-  
 ges Pont. Max. medium esse debere atque in neutram partem  
 propensorem statuisset: Ipse nullis precibus, nullis præmiis, Ne-

Constantia

K

que

Magnifi-  
centia.

que cum regna nepotibus, neque cum *Victoriæ* nepti tunc núbili, regii filii nuptiæ proponerentur, ab optima sententia deduci potuit: Semper inter Gallorum Regem, & *Cæsarem* æqualis & melius fuit, ad extremum usque mortalis uitæ punctum: Semper pacis quasi sequestrem, & caduceatorem se gessit. *Æge* uero de *PAVLI* publicis operibus, quæ se priscae ueteris urbis magnificentiæ ferè æquarunt, neq: multa, ne uestram in audiendo patientiam fatigemus, neque omnino nihil, ne tam præclara, tamque regia maximi principis uirtus prætermittatur, dicere aggrediamur. Hac ego in parte non sericam, uel auream uestem ad sacrarii et pontificiæ domus ornatum comparatam, quæ ob textilis operis pulchritudinem cotidie cum summa admiratione spectatur, non facti auri & argenti luculentum pondus, non pontificium diadema triplici præfulgens gemmarum, & margaritarum ordine successoribus relictum, non epuli apparatus, quod bis quot annis, quo die scilicet renunciatus fuerat, quodque coronam cæperat, publice dedit, non *Agonalia*, non ludos in *Tesæci* collis area, ex longo temporis interuallo, magnificentius multo quam ante factos memorabo. Speciosa quidem hæc, & ualde etiam ad hominum memoriam insignia: At illa quanto ampliora? quæ cum *DEI* & diuorum cultu, cum *Po. Rom.* ac totius urbane multitudinis uitæ ac fortunarum tutela coniunctam magnificentiam habuerunt? Tempia ad sempiterni *DEI* ac diuorum decus alia dedicauit, alia erexit, alia uetustate collapsa, sartis tectis nouandis ac restituendis instaurauit: Nullam omnino sacrarum ædium sacra ueste, signis, tabulis, argento, & auro plurimo non exornauit.

Publica o-  
perasacra  
& profana

uit. In huius uero ipsius, in qua hodierno die funebris hæc pompa ducitur, Basilicæ exædificationem tāta cura incubuit, ut ea iam prope ad fastigium perducta, substructionum magnificentia, cum sacris omnibus huius ætatis ædibus antecellat, una cum septem illis, quæ olim miraculo toti orbi terrarum fuerunt, operibus comparari posse uideatur. De noua quidem cella, quam PAVLO familiari cognominiq: diuo suo dicauit: Deq: Atrio, quod regum legationibus admittendis destinatum, regum nomine celebratur, quid attinet dicere? Duobus his certe operibus, siue sigillati lacunarum artificium, siue picturarum pulchritudinem spectes, nihil esse in urbe uideatur, quod cum à Basilica discesseris, maiore sit cum admiratione conspiciendum. Iam uero uel anniuersarias, uel ex longiore temporis intervallo repetitas supplicationes, ante ipsum certe nemo apparatius instruendas, aut solenniore cum pompa, maioreue Populi Ro. concursu celebrandas curauit. Intellexit præterea PAVLVS grauißimas atque insensissimas duas urbis felicitati aduersarias esse, crebram & prope annuam pestilentiam, & mænium, quorum omni fere ex parte hosti urbs erat peruia, infirmitatem. Primum igitur qua cura, qua diligentia, qua operum impensa prouidit, ut non minus perpetuo salubres essent urbis regiones, quam ante fuerant pestilentibus morbis infestæ? Nam & stagnantes in uaticani, et Ianiculi ualibus in paludum modum, aquas, quod earum exhalationibus cælum ab ea parte grauius redderetur, deductis fastigio in longinquiora loca fossis, exsiccauit. Vicorum et angiportuum tortuosos flexus ita remouit, ut uis ad lineam ubique directis, & recentes

Paludes exsiccatæ.

Via directæ.

semper auras domus admitterent, & uentorum flatibus quasi liberius præterlabentibus, tum solis tepores lenirentur, tum uero ad tentanda, lædendaque corpora nullam moram noxii halitus haberent. Perfectum itaque est, ut uetere illa urbi, qualis nempe fuit, cum in septem sita esset collibus, salubritate reddita, multis iam partibus plures huc conuenire undique sua transferant domicilia, quam quot ante uel sola inquilinos aeris, æstiu præsertim, sugaret infamia. Nouis cotidie domibus areæ occupantur. Noua cotidie hominum frequentia, quam longe lateque patet, urbs celebratur. Priuata uestigalia prolixiora multo, negotiatorum fides nullis temporum concussa casibus perpetuo stetit, suamque tutata est iam multos annos auctoritatem. Abundat rerum omnium copiis, omni opificiorum genere ciuitas, & quod post ingentes duorum superiorum Pontificatuû calamitates, ut fieri posse crederet, nunquam adduci quisquam potuisset, quando alio unquam tempore aut locupletior, aut pecuniosior fuerit, qui meminerit, aut sciat, nemo reperitur. Hanc opulentiam, hæc domesticorû bonorû incrementa non dubitabat PAVLVS inuidiosa fore, et ex eo prædatorû cupiditatem uehementer accensum iri. Omnia igitur hæc sibi quam tutissima, quamq; maxime custodita ut essent, præstandû censuit. Mœurû itaq; ab Auentini fronte contra Trigeminiû portam, per eiusdem montis latera utroq; uersum, ducere instituit, aggere et structura tam illum quidem ualidum, tamq; ullo tormentorum, aut machinarû genere inexpugnabilem, ut omnis inuadendæ ab ea parte, qua per Hostiensem uiam accessus patet, urbis hosti spes eriperetur. Eodemq; tẽpore mirandi operis propugnaculû ad Capenâ portam contra uiâ Appiam exci-

Vrbs mu-  
nita.

tauit. Non poterat quidem PAVLVS earum munitionum ab-  
 solutionem sperare, cui ne dum unius quantumvis magnanimi, &  
 uiuacis principis ætas satis foret, sed ad ea quæ inchoata essent  
 perficienda, nullius cuiusquam sufficere posset principatus diutur-  
 nitas. Atenum cum cœpisse aliquando tanti semper sapientes fe-  
 cerint, ut principium facti, dimidium appellare non dubitarint :  
 His certe operum exordiis, & non paruum urbi securitatem pe-  
 perit, & iis qui successuri essent, & muniri urbem oportere, et qui  
 bus maxime in partibus, et qua esset descriptione munienda, præ-  
 monstrandum suscepit. Qua ductus ratione, cum paucis ante an-  
 nis per eam murorum partem, quæ Vaticano imminet, subita ir-  
 ruptione in Transtyberinam regionem facta, urbs fuisset à Bar-  
 barico exercitu occupata & direpta, eam ipsam partem ualidis-  
 simo muro, atque inexpugnabilibus castellis ac propugnaculis, à  
 Ianiculo ad Tyberim, à leuo Vaticani cornu ad arcem, quæ mo-  
 li est imposta Hadriani, circumscepit. Quod certe opus, qui uestri  
 Patres, PAVLO successerit, is si absoluendū cūrarit, et ad PAVLI  
 gloriam magno ætatis nostræ plausu aspirarit, & tutū ac saluta-  
 rem uniuerso P. R. à belli periculis receptū præbuerit. Videtis Pa-  
 tres, quam multis, quamq; ingenti dignissimis admiratione operi-  
 bus, quanto religionis amore, quāto publicæ incolumitatis studio,  
 se orbi ostentarit, seq; in cælum iam extulerit PAVLI magnifi-  
 centia. Ad eam uero, quem attulit cunulū, excelsa illa ædifi-  
 cii moles, cum eminentissima & pulcherrima in Capitolino mon-  
 te specula? Illustratum aliis ornamentis Capitolium, & præci-  
 puo quodam insigni translata illuc ab arcæ Lateranorum, eque-  
 stri.

Domus  
Farne-  
sia.

Per ora-  
tio eorū  
quæ de  
magnifi-  
cētia di-  
cta sunt.

stri. *L. Veri statua, exornatum gradibus Capitolinum Prætorium, munitoque ad Constantini arcum uno, ad rupem Tarpeiam altero cliuo? Quod si his publicis omnibus urbis cum munitionibus, tum exornationibus, ab ipso dimensam & iam prope edificatam, medio inter Floræ campum ac Tyberim spatio, Farnesiam domum adiunxeris; attollentem se supra priuata omnia tectorum culmina, multaque lapidum & columnarum uarietate, luculento antiqui operis statuarum ac signorum numero, struetur & magnitudine ac totius descriptionis artificio spectabilem, quid in publica, aut priuata ætatis nostræ Maximi, uel Pontificis, uel regis uita splendidius, excelsiusue commemorari possit, reperire aut excogitare profecto nequeas. Nam qui urbem Romanam, qua paucae maiores moribus in orbe terrarum urbes, nulla sane augustior, nulla maiestatis plenior, qui urbem ipsam Romanam, sacris & profanis, publicis & priuatis ædificiis, tam multis, quam non multi ante ipsum Pontifices Max. ampliorem atque illustriorem reddiderit, qui quam insalubrem magna sui parte, & cœnosam accepisset, perpetua cæli temperatione fruentem, atque omni soli illuuiæ perpurgatam, quam hosti permeabilem, accessu difficilem, quam denique ruinosam, & prope senio confectam, firmam & ita ad multam temporis diuturnitatem nouatam reliquerit, huic, quos magnificentie titulos, aut inuidere omnis postera ætas debeat, aut non potius secundissimo hominum plausu tribuere? Exposui Patres, quantum cogitatione, & memoria consequi potui, uestri Pontificis Max. acta, uirtutes, merita, quæ illum nulli ferè non parem, multis cum Pontificibus*  
Max.



Max. tum uero magnis regibus atq: imperatoribus multo supe-  
 riorem effecerunt: Nunc quoniam summorum uirorum gloria,  
 ut sua à natura primordia, et à uirtute progressus, ita à bono euen-  
 tu ueluti quandam accipit expolitionem, de PAVLI felicitate DE PAVLI  
felicitate  
 cum pauca perstrinxero, huius laudationis iam perorandæ, suam  
 adesse maturitatem intelligam. Vos, patres optimi atque amplissi-  
 mi, obsecro, postremæ huic orationis meæ parti, pro uestra ho-  
 dierni mæroris mirifica significatione, aurium atque animorum  
 attentionem tribuite. Qua enim me audiendi patientia profecuti  
 fueritis, eam pie PAVLI memoriæ, uestroque isti maxime pio  
 luctui condonaueritis. Scio ego Patres, quod facile nos, & sensus  
 communis tacita quædam ratiocinatio docet, & sapientissimo-  
 rum hominum confirmat sententia, felicitatem supra humanam  
 omnem laudem esse, eamque de se præstare neminem posse. Qua-  
 re cum in Dei tota ferme sit numine ac potestate, neque crimini  
 aduersæ res cuiquam, neque secundæ, laudi tribui satis certa et re-  
 cta ratione possunt: Deprecari has nobis licet, illas optare: alte-  
 ras admiratione debemus, non prædicatione, non uituperatione  
 alteras, sed miseratione potius dignas ducere. Recte agere, & per-  
 peram, quod nostræ spontis est, aut in laude, aut in uitio pōnen-  
 dum, quod bene & feliciter euenerit, quidquid aggressi fuerimus,  
 totum est id diuini numinis maiestati, quam nullus fortunam li-  
 bitum est appellare, acceptum referendum. Hunc ego cælestem  
 fauorem tam præsentem ac propitium PAVLO uideo fuisse,  
 ut in quonam principe tam fuerit, tanque perpetuo summæ uir-  
 tuti admirabilis quædam adiuncta felicitas, ut omnia antiquita-



-tis exempla animo & cogitatione percurram, reperire profecto  
 nequeam. Quorum enim uita aut nefario scelere fuerit polluta,  
 aut graui aliqua corporis calamitate debilitata. Hos ego neuti-  
 quam felices, illos etiam miserrimos fuisse dixerim. Potuit ne *L.  
 Sylla*, potuit *L. Metellus* felicitis cognomento satis iure celebra-  
 ri, cum illius animus perpetuis agitatus furiis, immanitati, crude-  
 litatique suae nullum unquam modum statuerit? Hic annos mul-  
 tos oculis captus uixerit? *Alexandri Magni*, & *Timothei Co-*  
*nonis filii*, *Africani* praeterea et *Octauiani Caesaris* felicitatem,  
 aequae *Latinae* ac *Graecae* praedicat historia: Recens, aut certe non  
 peruetus memoria *Alfonsum* maiorem *Neapolitanorum* regem,  
*PAVLVM* & *Iulium* secundos, *Leonem*. x. Pontifices *Max.*  
 in felicitum numero reponit. At in illis & uita probra saepe glo-  
 rie splendorem obscurarunt, & aduersi tum publici, tum priua-  
 ti casus omnem euentorum prosperitatem contaminarunt: No-  
 strorum certe non parum secundae res fuerunt: sed nemo profe-  
 cto extraneorum fuerit bonorum satis intelligens aestimator, qui  
 non unius *PAULI*, quam illorum omnium sibi malit atq. ex-  
 petat felicitatem. Quid enim homini fas fuit optare, quod  
*PAULO* summus *DEVS* non larga & benigna manu imper-  
 tiuerit? Optabile est bono genere in amplis fortunis atque in opti-  
 ma urbe nasci. *PAVLVS* è clarissimis ortus est parentibus, &  
 hinc à *Pont. Max.* illinc à praestantissimis clarissimisque Ducib.  
 oriundis, iisdemque locupletissimis. Patria ei obtigit urbs haec, di-  
 gnitatis, maiestatis et imperii perpetuum domicilium. Praeclarum  
 est optimos ineuntis aetatis instituendae duces ac magistros nan-  
 cisci.

Felicitatis  
 partis  
 enumeratio  
 in qua inest  
 totius orationis  
 quaedam  
 quasi summa.

cisci. Quare gratiam Diis habuit suis Philippus Macedonum rex, quod filium eo potissimum tempore suscepisset, quo in magna fuit Aristoteles, propter singulare ingenium & incomparabilem doctrinam, nominis celebritate. PAVLI educatio in ea incidit tempora, quibus cum in aliis Italiae ciuitatibus, tum maxime Florentiae, Latinae, Graecaeque linguae, & omnium ingeniarum artium ac disciplinarum, magni & praeclari doctores uiguerunt. Naturae publicos honores capere, & magistratus gerere fortunatum homines putant. Vixdum uirilem togam PAVLVS ceperat, cum ad Remp. accessit, & nondum exacta adolescentia in amplissimum orbis terrae collegium istud uestrum est cooptatus. Pontificatu Maximo nihil cuiquam in rebus humanis esse potest, excelsius. Pontifex Max. sepe ante è comitiis exiturus creditus est, quod nemo eo dignior communi hominum opinione uideretur. Pontifex Max. creatus est, quo maxime tempore colapsam Rempub. eius unius consilio ac uirtute restitui atque erigi posse, & collegae eius omnes, & uniuerſi Reipub. principes iudicauerunt. Vita in Pontificatu tam ſeni diuturna ut maxime optanda fuerit, non fuit certe magnopere ſperanda: Tam multos uero annos uixit, ut ante eum quam pauciſſimis, & ii licet multo integriore ætate creati fuerint, longior uita contigerit. Et publicas quidem res domi, forisque quam ſæliciter, quamq: omnino ita ut uoluit geſſerit, ſatis eſt ſuis à nobis locis explicatum: In priuatis uero quid non ita ei euenit, ut melius à DEO precari ſibi neſas eſſe putare non debuerit? Quam ualde delectat florentem ætate, & uirtutum indole ornatam atque inſignem honoribus ac iam

L ad

ad posteritatis certissimam spem, propagatam uidere tam illustri familiae sobolem? Et sane ex illis mortalis huius uitae praemiis hoc unum est, quae piis et innocentibus pollicetur in sacrosanctae historiae monumentis DEVS. Vidit PAVLVS Nepotes duodecim: Quam eximia spe omnes, quae ex iis, iam adultos, uirtute, quibus in Remp. meritis, à me iam ante dictum est. Vidit etiam ex Nepote, & Nepte Pronepotes, & quod in tenui etiam fortuna tam non est frequens, quam in luculenta optatissimum uidit ex Octauio Nepote, & Caesaris filia desperata per multos ante annos sobole pueros geminos. Quod si Diagorae Rhodio uniuersa Graecia quod filios treis Gymnicorum Olympiae ludorum uictores habuisset, Quero Metello Macedonico olim Roma, quod à quatuor filiis, praetore uno, consularibus tribus, rogo illatus fuisset, felicitatis quasi palmas detulit, At quanto hoc in genere PAVLVS beator? cuius nunc funeri nepotes tres collegae uestri operam dant, tanto uel Metelli, uel Diagorae filiis illustriores, quanto uestra Patres dignitas atque amplitudo supra omnes alios est, atque uno tantum humanorum omnium honorum apice inferior. Absunt ex iis, qui per aetatem huic pompae interesse potuerunt, Reip. causa quaque spectata omnes uirtute, magnis clari omnes imperius. Beatissimus igitur PAVLVS, cuius cum summa uirtute multiplex fuit coniuncta felicitas. Fortunam hanc nos PAVLI, si placet, appellemus, modo ut intelligamus non fuisse tam DEO fauorabilem PAVLVM futurum, nisi iam tum ab ipso nascendi initio sibi eum DEVS delegisset, in quanta tot tantaeque res conferret, quot & quantas nemo, qui modo in sperando

Posteriusu-  
perstites.

sperando esset moderatior, à caelesti numine auderet optare. Huic ego diuino fauori tam hæc quæ de felicitàte nuper exposui, tribuenda iudico, quam rerum ab eo præclare gestarum profferitatem omnem, summæ & præcellentissimæ eius uirtutis certissimum fuisse opus, iam ante demonstravi. Neque enim unquam Patres adduci potui, ut iis assentirent, qui uni uel uirtuti, uel fortune aut omnino, aut nihil prorsus humanarum rerum concederent. Nam ut multa sunt, quæ ad hominum solertiam cum eueniunt referri nullo pacto possunt, sic propemodum alia quædam euentorum genera, sibi certa recte omnia gerendi, & ingenii celeritate ac consilii magnitudine explicandi ratio ita uindicat, ut nullum in his ius, nullam potestatem sibi fortuna queat arrogare. Mihi quidem in PAVLI acta intuenti, tam præclare eius uirtuti respondisse fortunam uideri solet, ut magnam utranque, & planè diuinam fuisse iudicem: Sed certiore atque expressiore multis partibus uirtutis prouocationem, quam fortune obsequiū. Eorum. n. quæ iam commemoravi euentorum, non utiq: multa à fortuna, plurima à consilio, atque altæ cuiusdam mentis tacita quadam ui profecta, non difficillime intelliget, qui rerū omnium quam recte, quaque maxime opus fuit ratione gestarum initia, progressus, exitus perspexerit. Quod si magnus ille minime uulgaris inter Græcos sapientiæ auctor, effrenati oris, atque exlegis uerborum finem esse dixit calamitatem: Cur ego bene, & præclare à PAVLO gestæ rei non multo maximam laudem perfectæ rationis, & orationis dignitati, quam sapientiam & eloquentiam dicimus, acceptam referendam putem? Nam quid tandem

hæc, cuius nomen tam sæpe homines usurpant, fortuna est? Erecta sit, & sublimis ad humanos casus aut contemnendos, aut perferendos uirtus: Fauens ac propitius iuuet DEVS, parum certe inter hæc ubi resideat, aut dominetur, fortunæ loci relinquatur. Cæca quedam uis ea est, quæ in iis dumtaxat, quæ prouideri non potuerunt, cernitur, quæque cum neque ab instanti, neque ab insequenti tempore naturæ suæ accipiat ius, neque omnino status, sed eius fuga tantummodo animaduertatur, tam nihil est, ut quid notionis habeat, aut quid planè sit, ne illi quidem satis explicarint, qui omnibus quid rebus proprium ac suum esset, certis compræhensum habere se finibus professi sunt. Atque hac quidem, in qua de fortuna agitur parte, qualis PAVLO declarandæ uirtutis occasio, quale se obtulit tempus? Is enim si perpetuo secundis (quod aiunt) uentis uitæ cursum tenuisset, maximus ille quidem, & felicissimus, ut in tempestatum tranquillitate gubernator haberi potuisset, sed quam sapienter ac fortiter aduersis se casibus insuperabilem atque inuictum præbuisset, quibus ex rebus id opinari ac sentire possemus, signi aut exempli causa nihil nobis reliquisset. At enim extremus uitæ quasi actus facile declarauit, non maiorem ullos temporum casus ad eius animum angoribus perstringendum, quam rationem ad uirtutem uehementius excitandam, uim habuisse. Nam cum exiguo temporis intervallo fortuna totam domum repetitis carissimorum caputum mortibus funestasset, & postremo inopinati funeris acerbissimam plagam inflixisset, quam ille unquam priuati doloris significationem dedit? quam ad primum atrocissimi luctus nuntium non grauifimo

Animi  
magnitudo  
in ad-  
uersis.

simo philosopho nedum generosissimo, & omni fortuna maiore  
 principe uocem misit? An non ita ad Remp. gerendam è pena-  
 tibus suis produit, ut in eius uultu omnem intestini maroris no-  
 tam eadem semper oris serenitas, eadem oculorum alacritas non  
 aboleuerit? Quodq; magis mirabamur omnes, nulla temporum  
 illorum iniquitas: nullæ quæ à certis hominibus insolentius iace-  
 rentur minæ ac terrores, non modo inuicti animi robur neque de-  
 bilitarunt, neque fregerunt, sed ne à firmissimo quidem illo, in  
 quem semper intentam & directam mentem habuit, domesticæ  
 ac publicæ dignitatis retinendæ atque amplificandæ statu, uel la-  
 tum (quod aiunt) unguem dimouere potuerunt. Hæc fuit P A V-  
 L O in omni uitæ parte magnarum uirtutum perpetua comes fæ-  
 licitas. Quid uero, mortis genus quodnam optatius potuit eueni-  
 re? Quodnam ad explendos omnes huius, de qua nunc loquimur, Mortis ge-  
nus.  
 felicitatis numeros magis appositum? Cuius uitæ exitus aut clau-  
 di tranquillius, aut D E O atque hominibus potuit sanctius com-  
 mendari? Vixit ille quandiu uiuere homini optabile esse debeat:  
 atq; aliquanto etiam amplius. Integerrima uero cum adhuc men-  
 te & sensibus uteretur, diuini illius animi igniculus secundissimo  
 naturæ afflatu adiuuante, è corporis uinculis non concitatus se pro-  
 ripuit, sed sine ullo uehementioris motus indicio, terrarum iam  
 quasi pertæsum esset, ad meliorem sedem nono fere mense post se-  
 cundum & octogesimum ætatis annum subuolauit. Septimus fuit  
 dies post festas atque anniuersarias de corona sua epulas, quo uos  
 ille sollemniter atque hilare acceperat. Pridie uos illius diei affatus,  
 uos complexus, non longiore quam quatrIdui morbo fatigatus, ex  
hæc



Per oratio  
in qua in-  
est deplo-  
ratio, con-  
solatio, ad  
hortatio.

*hac caduca, & miserabili uita ita excessit, ut se ad superos & ad eum in primis, quem semper sanctissime coluerat, quemque moribunda iam lingua iteratis appellabat uocibus, IESVM CHRISTVM cælestem suum, nostrumque parentem ac dominum peruenisse, dubitandum nemini prorsus reliquerit. Sed ad clausulam iam suam perueniat suscepta de PAVLI. III. Pont. Max. uita, moribus, in Remp. atque omne omnium hominum genus meritis, operibus, actis, ipso etiam obitu, in quasdam sanè rerum summas coacta, longior tamen quam absolutior, commentatio. Breuitatis enim immodico quodam studio percurri Patres singula non pertractavi: inuolui non explicavi, et plane excerpsti potius quam expressi. Quid enim ego unica queam oratione tam magni, tamq: diuini Principis laudes persequi, cum iis exornandis ac celebrandis nullos futurorum annalium calamos existimem suffecturos. Et profecto ut neque aliæ uirtutes, neq: alia uel corporis, uel animi, uel fortune, cum plura tamen multo PAVLI uitam illustrarint, ornamenta prædicentur: Hæc uero ipsa, quæ tam strictim attingi, cum uestris ac totius Reip. testimoniis comprobentur atque agnoscantur, an non is nobis, qui tantum tam multarum, tamq: ingentium laudum cumulum ad Pontificatum attulerit, cum primum Pont. Max. renunciatus est, quasi salutare quoddam numerum à cælo delapsus, & ad ætatis nostræ uitia corrigenda, miserrimas remouendas, imminentia pericula arcenda ac propulsanda quasi DEI ipsius manu in terras demissus uideri potuit? Iurè igitur tunc optatissimum & faustissimum de eius creatione nuntium cum ingenti plausu excepimus, & ad usitatas illas commu-*



nis gratulationis significationes, inusitata quadam lætitia exultauimus & effloruimus. Et iure nunc optimo ac sanctissimo parente orbati, nouo & uix ferendo ardemus dolore, luctu, squallore prope ac mærore tabescimus. Cuius enim iam nos, cum illo statim amisso teterrima importunissimæ tempestatis procella nobis cœperit impendere, cuius iam inquam nos consilio & auctoritate nitentur? Cuius inuicti animi magnitudine sustentabimur? Cuius fide, facilitate & clementia recreabimur? Video Patres optimi, uideo, & ex oris oculorumque uestrorum mæstitia plane perspicio, ad uestram animi ægritudinem leuandam, doloremque minuendum, eam consolationis rationem maxime obuiam & hominum tacitis cogitationibus expositam, parum aut omnino nihil ualere. Erat iam PAVLVS senio confectus: Quo poterat tandem, si nunc conualuisset, longius ætatis procedere? At mente cum esset firmissima ac constantissima, uel unicum si superuixisset annu, quam præclaros eius anni fructus laturos fuisset? Nam si improbi & nequam principis uel breuissimam uitam, ad euertenda perdendaque omnia nimis multum spaci habuisse queri populi solent, PAVLO, cuius pontificatu orbis terræ salus nitebatur, cur uitæ quantam maxime potuit, diuturnitatem non contigisse, non ægerrime feramus? Ac nostra quidem ipsorum, Patres, causa angori nostro uenia danda est. Immortalitatem ille huius uitæ, quod fas homini non esse sciebat, nunquam optauit. Quæ in bonis ducuntur, reliqua ita est consecutus, ut sola ei esset, cuius iam compotem factum nihil est quod dubitemus, cælestis æternitas expetenda. Beatissimus igitur ille nunc maxime.

Nos

Nos eius uirtutis ac sapientiæ præsidis orbat, iure in mærore, et iustissima deploratione uersamur. Defecit enim, ut magni illi uates, & maximarum calamitatum, ac cladum deploratores dixeret, gaudiū cordis nostri: uersus est in luctum chorus noster. Dies festi nostri conuersi sunt in lamentationem et ploratum. Sed quis tandem desiderio nostro modus reperiri, quæ consolationis ratio iniri poterit? communia illa quidem sunt Patres omnibus gentibus, & cuiusvis ordinis hominum nationibus, ac iam prope nimis uulgata: Sua causa animo angit, hominum esse ad suam utilitatem omnia referentium: Qui e uita excedant, à malis eos, à quibus futuram sibi uacationem, & perpetuam securitatem præstare non possint, abduci. Esse omnibus, qui nati sint, hoc tanquam æs alienum naturæ dissoluendum. Ferenda quæ necessario contingunt, & sua præcipue cum maturitate, æquissimo animo, non deploranda. Trita uero illa cum ciuiliū hominum sermonibus, tum in alienigenarum (ut ita dixerim) & nostratium philosophorum disputationibus: Quā mortem uulgo dicimus, iis, qui sancte, pieq; uixerunt, melioris, ac uerioris uitæ initium esse. Sed quam illud ad omnem luctus acerbicatem leniendam accommodatum, quod ille ipse, unde suum fere exorsum oratio mea habuit, Deus, & homo, ille inquam ipse, qui cunctos mortales, qui sibi fidem habuissent, mortis ut expertes essent, per mirificam illam sui corporis deuotionem effecit, claris, & auctoritatis plenissimis uocibus, eos qui nobiscum esse deserint, lugeri uetat. Diuinitus ille quidem hoc, ut omnia. Nam si pro noxis æternis torquentur cruciatibus, impios luctu dignos ducere, diuinam est maiestatem ledere. Piis

uero,

uero, quos dileximus, & caros habuimus, quid sempiterna DEI  
 beneficia, & corporum redintegrationem, quam nobis Christia-  
 nae religionis professio certam, & ratam esse iubet, inuideamus?  
 Caelo iam Patres, caelo receptam esse PAULI mentem, pro  
 DEI immensa clementia, proque antea actae uitae meritis existi-  
 memus. Intuetur igitur illinc nos e medio caelorum choro: Hunc  
 luctum uestrum, has lachrymas superuacaneas, ac nihil omnino  
 ad se putat pertinere. Vestro tamen eas amoris erga se, & pietati  
 ignoscit atque indulget: Ne quoque ex hoc loco aliquid de eius  
 laudibus agere conantem, uel per singultus potius balbutientem,  
 sua, credo, miseratione prosequitur. Si quibus oculis in suo nuper  
 sedentem solio contemplantur, eum nunc aspicere, si quibus  
 auribus grauissimas eius uoces, quin uerius oracula accipiebatis,  
 e caelo nunc missa monita auscultare possitis, nihil credi faci-  
 lius, quam iussurum eum, ut plorandi & coquerendi primo quoque  
 tempore finem faciat. Satis quidem certa & expressa uestra er-  
 ga se officii documenta habiturum: satis pro eo, quanti uos sem-  
 per fecit, magnam sibi gratiam relatu-ros: si non solum domum  
 totam suam tueri uti cepistis, perrexeritis, ac nepotes hosce in pri-  
 mis treis, quos uobis & quia poposcistis, & quia sui quam simil-  
 limos fore confidebat, collegas dedit, paterna seniores, & aequales ue-  
 ro fraterna beneuolentia fueritis complexi. Sed multo maxime si  
 mentem uestram, uestraque consilia ad eas actiones conuerteri-  
 tis, quae isto uestro Reipub. principatu dignissima habeantur:  
 Atque omnino uideritis, ne cuius a PETRO primo IESU CHRI-  
 STI legato, gubernacula uobis tradita sunt, spoliata, ut poeta  
 inquit,

inquit, armis, ex cussa magistro, deficiat nquis tantis surgentibus  
undis: Ne scilicet repentina hac temporum perturbatione cum  
magno naufragii periculo uspiam impingat. Facile uero, ut opi-  
nor, hæc patres efficietis, si & PAVLI uitam emulari nun-  
quam desieritis, & proximis de nouo Pont. comitiis, eum PAV-  
LO successorem mature creaueritis, qui pastor & ipse optimus ac  
uigilantissimus, luporum, furum ac latronum insidias arceat,  
commissoq; fidei, & custodiæ suæ greges non solum tueatur, sed  
in unicum etiam ouile congreget: Qui iure, meritoque suo uniuersæ  
Reip. Christianæ acceptissimus esse debeat: Qui magna cum  
pietate, ac religione secularis anni, quod nunc instat, sanctissi-  
mum lustrum celebret, suoque condat tempore: Qui postremo à  
PAVLI. III. uirtute ac sapientia tam prope absit, quam  
longe PAVLVS ipse, & utriusque PAVLI &  
complurium superiorum Pontificum Maxi-  
morum laudes & gloriam  
superauit.



## D I X I.

Ego Frater Vincentius Bononiensis Vicarius San-  
ctissimæ Inquisitionis, approbo præsentem ora-  
tionem dari impressioni ut catholicam.

Impressa BONONIÆ in officina Ioannis Rubci.

M D L X I I I.

# E R R A T A.

Pag.	7	vers.	2	eum cum	
Ibidem	In margine			Cardinalium Cardinalis	
Pag.	13	vers.	1	quidem.Sed quidem, sed	
Pag.	15	vers.	24	cuius eius	
Pag.	17	vers.	17	ditionis ditionis	
Pag.	19	vers.	5	domum demum	
Ibidem		vers.	8	uero uiro	
Ibidem		vers.	16	potuerunt patuerunt	
Pag.	20	vers.	1	informari. Et iam informari, et	
Pag.	21	vers.	8	eum cum	(iam
Pag.	22	vers.	5	tenuitur tenuiter	
Ibidem		vers.	21	uistior iustior	
Ibidem		vers.	24	Si tam Si eam	
Pag.	23	vers.	11	uistius iustius	
Ibidem		vers.	18	egerrime ægerrime	
Pag.	24	vers.	4	abortis obortis	
Pag.	27	vers.	12	eum cum	
Pag.	28	vers.	7	per paucos perpaucos	
Pag.	41	vers.	17	Ecclesię: Cardines Ecclesię Car	
Pag.	46	vers.	2	fasti facti	( dines
Pag.	50	vers.	22	Epaminundam Epaminódam	
Pag.	52	vers.	20	compræhensus compræhensas	
Pag.	59	vers.	24	agnascere agnasci	
Pag.	61	vers.	2	sæcuritas securitas	
Pag.	65	vers.	15	nos, cum nos cum	
Pag.	66	vers.	26	poeni Poeni	
Pag.	73	vers.	3	ob hoc ab hoc	

1	1	1
2	2	2
3	3	3
4	4	4
5	5	5
6	6	6
7	7	7
8	8	8
9	9	9
10	10	10
11	11	11
12	12	12
13	13	13
14	14	14
15	15	15
16	16	16
17	17	17
18	18	18
19	19	19
20	20	20
21	21	21
22	22	22
23	23	23
24	24	24
25	25	25
26	26	26
27	27	27
28	28	28
29	29	29
30	30	30
31	31	31
32	32	32
33	33	33
34	34	34
35	35	35
36	36	36
37	37	37
38	38	38
39	39	39
40	40	40
41	41	41
42	42	42
43	43	43
44	44	44
45	45	45
46	46	46
47	47	47
48	48	48
49	49	49
50	50	50
51	51	51
52	52	52
53	53	53
54	54	54
55	55	55
56	56	56
57	57	57
58	58	58
59	59	59
60	60	60
61	61	61
62	62	62
63	63	63
64	64	64
65	65	65
66	66	66
67	67	67
68	68	68
69	69	69
70	70	70
71	71	71
72	72	72
73	73	73
74	74	74
75	75	75
76	76	76
77	77	77
78	78	78
79	79	79
80	80	80
81	81	81
82	82	82
83	83	83
84	84	84
85	85	85
86	86	86
87	87	87
88	88	88
89	89	89
90	90	90
91	91	91
92	92	92
93	93	93
94	94	94
95	95	95
96	96	96
97	97	97
98	98	98
99	99	99
100	100	100

